

二十四史輯要

冊
五

二十四史輯要

卷之五十一 遼

太祖 遼史

太祖大聖大明神烈天皇帝姓耶律氏諱億字阿保機小字啜里只契丹迭刺部霞
瀨益石烈鄉耶律彌里人德祖皇帝長子母曰宣簡皇后蕭氏唐咸通十三年生初
母夢日墮懷中有娠及生室有神光異香體如三歲兒卽能匍匐祖母簡獻皇后異
之鞠爲己子常匿於別幕塗其面不令人見三月能行晬而能言知未然事自謂
左右若有神人翼衛雖齟齬言必及世務時伯父當國疑輒咨焉旣長身長九尺豐
上銳下目光射人關弓三百斤爲撻馬狻沙里時小黃室韋不附太祖以計降之伐
越兀及烏古六奚比沙狻諸部克之國人號阿主沙里唐天復元年歲辛酉痕德董
可汗立以太祖爲本部夷离董專征討連破室韋于厥及奚帥轄刺哥俘獲甚衆冬
十月授大迭烈府夷离董明年秋七月以兵四十萬伐河東河北攻下九郡獲生口
九萬五千駝馬牛羊不可勝紀九月城龍化州于潢河之南始建開教寺明年春伐

女直下之獲其戶三百九月復攻下河東懷遠等軍冬十月引軍略至薊北俘獲以還先是德祖俘奚七千戶徙饒樂之清河至是創爲奚迭刺部分十三縣遂拜太祖于越總知軍國事明年歲甲子三月廣龍化州之東城九月討黑車子室韋唐盧龍軍節度使劉仁恭發兵數萬遣養子趙霸來拒霸至武州太祖諜知之伏勁兵桃山下遣室韋人牟里詐稱其酋長所遣約霸兵會平原既至四面伏發擒霸殲其衆乘勝大破室韋明年七月復討黑車子室韋唐河東節度使李克用遣通事康令德乞盟冬十月太祖以騎兵七萬會克用于雲州宴酣克用借兵以報劉仁恭木瓜澗之役太祖許之易袍馬約爲兄弟及進兵擊仁恭拔數州盡徙其民以歸明年二月復擊劉仁恭還襲山北奚破之汴州朱全忠遣人浮海奉書幣衣帶珍玩來聘十一月遣偏師討奚霫諸部及東北女直之未附者悉破降之十二月痕德堇可汗殂羣臣奉遺命請立太祖曷魯等勸進太祖三讓從之

元年春正月庚寅命有司設壇于如迂王集會塙燔柴告天卽皇帝位尊母蕭氏爲皇太后立皇后蕭氏北宰相蕭轄刺南宰相耶律歐里思率羣臣上尊號曰天皇帝

后曰地皇后庚子詔皇族承遙輦氏九帳爲第十帳二月戊午以從弟迭栗底爲迭烈府夷离董是月征黑車子室韋降其八部夏四月丁未朔唐梁王朱全忠廢其主尋弑之自立爲帝國號梁遣使來告劉仁恭子守光囚其父自稱幽州盧龍軍節度使秋七月乙酉其兄平州刺史守奇率其衆數千人來降命置之平盧城冬十月乙巳討黑車子室韋破之

二年春正月癸酉朔御正殿受百官及諸國使朝辛巳始置惕隱典族屬以皇弟撒刺爲之河東李克用子存勗襲遣使弔慰夏五月癸酉詔撒刺討烏丸黑車子室韋秋八月壬子幽州進合歡瓜冬十月己亥朔建明王樓築長城於鎮東海口遣輕兵取吐渾叛入室韋者

三年春正月幸遼東二月丁酉朔梁遣郎公遠來聘三月滄州節度使劉守文爲弟守光所攻遣人來乞兵討之命皇弟舍利素夷离董蕭敵魯以兵會守文於北淖口進至橫海軍近淀一鼓破之守光潰去因名北淖口爲會盟口夏四月乙卯詔左僕射韓知古建碑龍化州大廣寺以紀功德五月甲申置羊城于炭山之北以通市易

冬十月己巳遣鷹軍討黑車子室韋破之西北唃娘改部族進輓車人

四年秋七月戊子朔以后兄蕭敵魯爲北府宰相后族爲相自此始冬十月烏馬山奚庫支及查刺底鋤勃德等叛討平之

五年春正月丙戌朔日有食之丙申上親征西部奚奚阻險叛服不常數招諭弗聽是役所向輒下遂分兵討東部奚亦平之於是盡有奚霫之地東際海南暨白檀西踰松漠北抵潢水凡五部咸入版籍三月次灤河刻石紀功復略地薊州夏四月壬申遣人使梁五月皇弟刺葛迭刺寅底石安端謀反安端妻粘睦姑知之以告得實上不忍加誅乃與諸弟登山刑牲告天地爲誓而赦其罪出刺葛爲迭刺部夷离堇封粘睦姑爲晉國夫人秋七月壬午朔斜離底洎諸蕃使來貢八月甲子劉守光僭號幽州稱燕冬十月戊午置鐵冶十一月壬午遣人使梁

六年春正月以化葛爲惕隱二年戊午親征劉守光三月至自幽州夏四月梁郢王友珪弑父自立秋七月丙午親征尤不姑降之俘獲以數萬計命弟刺葛分兵攻平州八月壬辰上次恩德山皇子李胡生冬十月戊寅刺葛破平州還復與迭刺寅底

石安端等反甲申遣人使梁致祭壬辰還次北阿魯山聞諸弟以兵阻道引軍南趨十七灤是日燔柴翼日次七渡河諸弟各遣人謝罪上猶矜憐許以自新是歲以兵討兩冶以所獲僧崇文等五十人歸西樓建天雄寺以居之以示天助雄武七年春正月甲辰朔以用兵免朝晉王李存勗拔幽州擒劉守光甲寅王師次赤水城弟刺葛等乞降上素服乘赭白馬以將軍耶律樂姑轄刺僅阿鉢爲御解兵器肅侍衛以受之因加慰諭刺葛等引退上復數遣使撫慰二月甲戌朔梁均王友貞討殺其兄友珪嗣立三月癸丑次蘆水弟迭刺哥圖爲奚王與安端擁千餘騎而至給稱入觀上怒曰爾曹始謀逆亂朕特恕之使改過自新尙爾反覆將不利於朕遂拘之以所部分隸諸軍而刺葛引其衆至乙室堇淀具天子旗鼓將自立皇太后陰遣人諭令避去會弭姑乃懷里陽言車駕且至其衆驚潰掠居民北走上以兵追之刺葛遣其黨寅底石引兵徑趨行宮焚其輜重廬帳縱兵大殺皇后急遣蜀古魯救之僅得天子旗鼓而已其黨神速姑復劫西樓焚明王樓上至土河秣馬休兵若不爲意諸將請急追之上曰俟其遠遁人各懷土懷土旣切其心必離我軍乘之破之必矣盡以

先所獲資畜分賜將士留夷离畢直里姑總政務夏四月戊寅北追刺葛己卯次彌里問諸弟面木葉山射鬼箭厭禳乃執叛人解里向彼亦以其法厭之至達里淀選輕騎追及培只河盡獲其黨輜重生口先遣室韋及吐渾酋長拔刺迪里姑等五人分兵伏其前路命北宰相迪里古爲先鋒進擊之刺葛率兵逆戰迪里古以輕兵薄之其弟遏古只臨陣射數十人斃衆莫敢前相拒至晡衆乃潰追至柴河遂自焚其車乘廬帳而去前遇拔刺迪里姑等伏發合擊遂大敗之刺葛奔潰遺其所奪神帳於路上見而拜奠之所獲生口盡縱歸本土其黨庫古只磨朶皆面縛請罪師次札堵河大雨暴漲五月癸丑遣北宰相迪輦率驍騎先渡甲寅奏擒刺葛涅里袞阿鉢於榆河前北宰相蕭實魯寅底石自剄不殊遂以黑白羊祭天地壬戌刺葛涅里袞阿鉢詣行在以橐索自縛牽羊望拜上還至大嶺時大軍久出輜重不相屬士卒煮馬駒採野菜以爲食孳畜道斃者十七八物價十倍器服資貨委棄於楚里河狼藉數百里因更刺葛名暴里丙寅至庫里以青牛白馬祭天地以生口六百馬二千三百分賜大小鶻軍六月辛巳至榆嶺以轄賴縣人掃古非法殘民磔之甲申上登都

庵山撫其先奇首可汗遺跡徘徊顧瞻而興歎焉聞獄官涅离擅造大校人不堪其苦有至死者命誅之壬辰次狼河獲逆黨雅里彌里生種之銅河南軌下放所俘還多爲于骨里所掠上怒引輕騎馳擊復遣驍將分道追襲盡獲其衆并掠者庚子次阿敦灤以養子涅里思附諸弟叛以鬼箭射殺之其餘黨六千各以輕重論刑于厥掠生口者三十餘人亦俾贖其罪放歸本部至石嶺西詔收回軍乏食所棄兵仗召北府兵驗而還之以夷离董涅里袞附諸弟爲叛不忍顯戮命自投崖而死秋八月己卯幸龍眉宮轅逆黨二十九人以其妻女賜有功將校所掠珍寶孳畜還主亡其本物者命責償其家不能償者賜以其部曲九月壬戌上發自西樓冬十月庚午駐赤崖戊寅和州回鶻來貢癸未乙室府人迪里古迷骨离部人特里以從逆誅詔羣臣分決滯訟以韓知古錄其事只里姑掌捕亡十一月祠木葉山還次昭烏山省風俗見高年議朝政定吉凶儀十二月戊子燔柴于蓮花灤

八年春正月甲辰以曷魯爲迭刺部夷离董忽烈爲惕隱于骨里部人特离敏執逆黨怖胡亞里只等十七人來獻上親鞫之辭多連宗室及有脅從者乃杖殺首惡怖

胡餘竝原釋于越率懶之子化哥屢蓄姦謀上每優容之而反覆不悛召父老羣臣正其罪并其子戮之分其財以給衛士有司所輸逆黨三百餘人獄既具上以人命至重死不復生賜宴一日隨其平生之好使爲之酒酣或歌或舞或戲射角觥各極其意明日乃以輕重論刑首惡刺葛其次迭刺哥上猶弟之不忍寘法杖而釋之以寅底石安端性本庸弱爲刺葛所使皆釋其罪前于越赫底里子解里刺葛妻轄刺己實預逆謀命皆絞殺之寅底石妻涅离脅從安端妻粘睦姑嘗有忠告竝免因謂左右曰諸弟性雖敏黠而蓄姦稔惡嘗自矜有出人之智安忍兇狠谿壑可塞而貪黷無厭求人之失雖小而可恕謂重如泰山身行不義雖入大惡謂輕於鴻毛昵比羣小謀及婦人同惡相濟以危國祚雖欲不敗其可得乎北宰相實魯妻餘盧覩姑於國至親一旦負朕從于叛逆未寘之法而病死此天誅也解里自幼與朕嘗同寢食眷遇之厚冠於宗屬亦與其父背大恩而從不軌茲可恕乎秋七月丙申朔有司上諸帳族與謀逆者三百餘人罪狀皆棄市上歎曰致人于死豈朕所欲若止負朕躬尙可容貸此曹恣行不道殘害忠良塗炭生民剽掠財產民間昔有萬馬今皆徒

步有國以來所未嘗有實不得已而誅之冬十月甲子朔建開皇殿於明王樓基
九年春正月烏古部叛討平之夏六月幽州軍校齊行本舉其族及其部曲男女三
千人請降詔授檢校尙書左僕射賜名兀欲給其廩食數日亡去幽帥周德威納之
及詔索之德威語不遜乃議南征冬十月戊申釣魚于鴨淥江新羅遣使貢方物高
麗遣使進寶劔吳越王錢鏐遣滕彥休來貢是歲君基太一神數見詔圖其像神冊
元年春二月丙戌朔上在龍化州迭烈部夷离堇耶律葛魯等率百僚請上尊號三
表乃允丙申羣臣及諸屬國築壇州東上尊號曰大聖大明天皇帝后曰應天大明
地皇后大赦建元神冊初闕地爲壇得金鈴因名其地曰金鈴岡壇側滿林曰冊聖
林三月丙辰以迭烈部夷离堇葛魯爲阿廬朶里于越百僚進秩頒賚有差賜酺三
日立子倍爲皇太子夏四月乙酉朔晉幽州節度使盧國用來降以爲幽州兵馬留
後甲辰梁遣郎公遠來賀六月庚寅吳越王遣滕彥休來貢秋七月壬申親征突厥
吐渾党項小蕃沙陀諸部皆平之俘其酋長及其戶萬五千六百鎧甲兵仗器服九
十餘萬寶貨駝馬牛羊不可勝算八月拔朔州擒節度使李嗣本勒石紀功於奇塚

南冬十月癸未朔乘勝而東十一月攻蔚新武媯儒五州斬首萬四千七百餘級自代北至河曲踰陰山盡有其地遂改武州爲歸化州媯州爲可汗州置西南面招討司選有功者領之其圍蔚州敵樓無故自壞衆軍大譟乘之不踰時而破時梁及吳越二使皆在焉詔引環城觀之因賜滕彥休名曰述呂十二月收山北八軍

二年春二月晉新州裨將盧文進殺節度使李存矩來降進攻其城刺史安金全遁以文進部將劉殷爲刺史三月辛亥攻幽州節度使周德威以幽并鎮定魏五州兵拒于居庸關之西合戰於新州東大破之斬首三萬餘級殺李嗣本之子武八以后弟阿骨只爲統軍實魯爲先鋒東出關略燕趙不遇敵而還己未于骨里叛命室魯以兵討之夏四月壬午圍幽州不克六月乙巳望城中有氣如烟火狀上曰未可攻也以大暑霖潦班師留曷魯盧國用守之刺葛與其子賽保里叛入幽州秋八月李存勗遣李嗣源等救幽州曷魯等以兵少而還

三年春正月丙申以皇弟安端爲大內惕隱命攻雲州及西南諸部二月達旦國來聘癸亥城皇都以禮部尙書康默記充版築使梁遣使來聘晉吳越渤海高麗回鶻

阻卜党項及幽鎮定魏潞等州各遣使來貢夏四月乙巳皇弟迭烈哥謀叛事覺知有罪當誅預爲營壙而諸戚請免上素惡其弟寅底石妻涅里袞乃曰涅里袞能代其死則從涅里袞自縊壙中并以奴女古叛人曷魯只生瘞其中遂赦迭烈哥五月乙亥詔建孔子廟佛寺道觀秋七月乙酉于越曷魯薨上震悼久之輟朝三日贈賻有加冬十二月庚子朔幸遼陽故城辛丑北府宰相蕭敵魯薨戊午以于越曷魯弟汗里軫爲迭烈部夷离董蕭阿古只爲北府宰相甲子皇孫隈欲生

四年春正月丙申射虎東山二月丙寅修遼陽故城以漢民渤海戶實之改爲東平郡置防禦使夏五月庚辰至自東平郡秋八月丁酉謁孔子廟命皇后皇太子分謁寺觀九月征烏古部道聞皇太后不豫一日馳六百里還侍太后病間復還軍中冬十月丙午次烏古部天大風雪兵不能進上禱于天俄頃而霽命皇太子將先鋒軍進擊破之俘獲生口萬四千二百牛馬車乘廬帳器物二十餘萬自是舉部來附

五年春正月乙丑始製契丹大字夏五月丙寅吳越王復遣滕彥休貢犀角珊瑚授官以遣庚辰有龍見于拽刺山陽水上上射獲之藏其骨內府閏六月丁卯以皇弟

蘇爲惕隱康默記爲夷離畢秋八月己未朔党項諸部叛辛未上親征九月己丑朔
梁遣郎公遠來聘壬寅大字成詔頒行之皇太子率迭刺部夷離董汗里軫等略地
雲內天德冬十月辛未攻天德癸酉節度使宋瑤降賜弓矢鞍馬旗鼓更其軍曰應
天甲戌班師宋瑤復叛丙子拔其城擒宋瑤俘其家屬徙其民於陰山南十二月己
未師還

六年春正月丙午以皇弟蘇爲南府宰相迭里爲惕隱南府宰相自諸弟搆亂府之
名族多罹其禍故其位久虛以鋤得部轄得里只里古攝之府中數請擇任宗室上
以舊制不可輒變請不已乃告于宗廟而後授之宗室爲南府宰相自此始夏五月
丙戌朔詔定法律正班爵丙申詔畫前代直臣像爲招諫圖及詔長吏四孟月詢民
利病六月乙卯朔日有食之冬十月癸丑朔晉新州防禦使王郁以所部山北兵馬
內附丙子上率大軍入居庸關十一月癸卯下古北口丁未分兵略檀順安遠三河
良鄉望都潞滿城遂城等十餘城俘其民徙內地十二月癸丑王郁率其衆來朝上
呼郁爲子賞賚甚厚而徙其衆于潢水之南庚申皇太子率王郁略地定州康默記

攻長蘆晉義武軍節度使王處直養子都囚其父自稱留後癸亥圍涿州有白兔緣壘而上是日破其郭癸酉刺史李嗣弼以城降乙亥存勗至定州王都迎謁馬前存勗引兵趨望都遇我軍禿餒五千騎圍之存勗力戰數四不解李嗣昭領三百騎來救我軍少却存勗乃得出大戰我軍不利引歸存勗至幽州遣二百騎躡我軍後我軍反擊悉擒之己卯還次檀州幽人來襲擊走之擒其裨將詎徒檀順民于東平瀋州

天贊元年春二月庚申復徇幽薊地癸酉詔改元赦軍前殊死以下夏四月甲寅攻薊州戊午拔之擒刺史胡瓊以盧國用涅魯古典軍民事壬戌大饗軍士癸亥李存勗圍鎮州張文禮求援命郎君迭烈將軍康末怛往擊敗之殺其將李嗣昭辛未攻石城縣拔之五月丁未張文禮卒其子處瑾遣人奉表來謝六月遣鷹軍擊西南諸部以所獲賜貧民冬十月甲子以蕭霞的爲北府宰相分迭刺部爲二院斜涅赤爲北院夷離董縮思爲南院夷離董詔分北大濃兀爲二部立兩節度使以統之十一月壬寅命皇子堯骨爲天下兵馬大元帥略地薊北

二年春正月丙申大元帥堯骨克平州獲刺史趙思溫裨將張崇二月如平州甲子以平州爲盧龍軍置節度使三月戊寅軍于箭筈山討叛奚胡損獲之射以鬼箭誅其黨三百人沉之狗河置奚墮瑰部以勃魯恩權總其事夏四月己酉梁遣使來聘吳越王遣使來貢癸丑命堯骨攻幽州迭刺部夷离董覲烈狗山西地庚申堯骨軍幽州東節度使符存審遣人出戰敗之擒其將裴信父子閏月庚辰堯骨抵鎮州壬午拔曲陽丙戌下北平是月晉王李存勗卽皇帝位國號唐五月戊午堯骨師還癸亥大饗軍士賞賚有差六月辛丑波斯國來貢秋七月前北府宰相蕭阿古只及王郁狗地燕趙冬十月辛未朔日有食之己卯唐兵滅梁

三年春正月遣兵略地燕南夏五月丙午以惕隱迭里爲南院夷离董是月徙薊州民實遼州地渤海殺其刺史張秀實而掠其民六月乙酉召皇后皇太子大元帥及二宰相諸部頭等詔曰上天降監惠及烝民聖主明王萬載一遇朕旣上承天命下統羣生每有征行皆奉天意是以機謀在己取舍如神國令旣行人情大附舛訛歸正遐邇無愆可謂大含溟海安納泰山矣自我國之經營爲羣方之父母憲章斯在

胤嗣何憂升降有期去來在我良籌聖會自有契於天人衆國羣王豈可化其凡骨
三年之後歲在丙戌時值初秋必有歸處然未終兩事豈負親誠日月非遙戒嚴是
速聞詔者皆驚懼莫識其意是日大舉征吐渾党項阻卜等部詔皇太子監國大元
帥堯骨從行秋七月辛亥曷刺等擊素昆那山東部族破之八月乙酉至烏孤山以
鵝祭天甲午次古單于國登阿里典壓得斯山以麋鹿祭九月丙申朔次古回鶻城
勒石紀功庚子拜日于躡林丙午遣騎攻阻卜南府宰相蘇南院夷离董迭里略地
西南乙卯蘇等獻俘丁巳鑿金河水取烏山石輦致潢河木葉山以示山川朝海宗
嶽之意癸亥大食國來貢甲子詔礮關遏可汗故碑以契丹突厥漢字紀其功是月
破胡母思山諸蕃部次業得思山以赤牛青馬祭天地回鶻霸里遣使來貢冬十月
丙寅朔獵寓樂山獲野獸數千以充軍食丁卯軍于霸離思山遣兵踰流沙拔浮圖
城盡取西鄙諸部十一月乙未朔獲甘州回鶻都督畢離遏因遣使諭其主烏母主
可汗射虎于烏刺邪里山抵霸室山六百餘里且行且獵日有鮮食軍士皆給

四年春正月壬寅以捷報皇后皇太子二月丙寅大元帥堯骨略党項丁卯皇后遣

康末怛問起居進御服酒膳乙亥蕭阿古只略燕趙還進牙旗兵仗辛卯堯骨獻党
項俘三月丙申饗軍于水精山夏四月甲子南攻小蕃下之皇后皇太子迎謁於札
里河癸酉回鶻烏母主可汗遣使貢謝五月甲寅清暑室韋北陁秋九月癸巳至自
西征冬十月丁卯唐以滅梁來告卽遣使報聘庚辰日本國來貢辛巳高麗國來貢
十一月丁酉幸安國寺飯僧赦京師囚縱五坊鷹鶻己酉新羅國來貢十二月乙亥
詔曰所謂兩事一事已畢惟渤海世讐未雪豈宜安駐乃舉兵親征渤海大誣謬皇
后皇太子大元帥堯骨皆從閏月壬辰祠木葉山壬寅以青牛白馬祭天地于烏山
己酉次撒葛山射鬼箭丁巳次商嶺夜圍扶餘府

天顯元年春正月己未白氣貫日庚申拔扶餘城誅其守將丙寅命惕隱安端前北
府宰相蕭阿古只等將萬騎爲先鋒遇誣謬老相兵破之皇太子大元帥堯骨南府
宰相蘇北院夷离堇斜涅赤南院夷离堇迭里是夜圍忽汗城己巳誣謬請降庚午
駐軍于忽汗城南辛未誣謬素服橐索牽羊率僚屬三百餘人出降上優禮而釋之
甲戌詔諭渤海郡縣丙子遣近侍康末怛等十三人入城索兵器爲邏卒所害丁丑

誣譖復叛攻其城破之駕幸城中誣譖請罪馬前詔以兵衛誣譖及族屬以出祭告
天地復還軍中二月庚寅安邊鄭頡南海定理等府泊諸道節度刺史來朝慰勞遣
之以所獲器幣諸物賜將士壬辰以青牛白馬祭天地大赦改元天顯以平渤海遣
使報唐甲午復幸忽汗城閱府庫物賜從臣有差以奚部長勃魯恩王郁自回鶻新
羅吐蕃党項室韋沙陀烏古等從征有功優加賞賚丙午改渤海國爲東丹忽汗城
爲天福册皇太子倍爲人皇王以主之以皇弟迭刺爲左大相渤海老相爲右大相
渤海司徒大素賢爲左次相耶律羽之爲右次相赦其國內殊死以下丁未高麗滅
貂鐵驪靺鞨來貢三月戊午遣夷离董康默記左僕射韓延徽攻長嶺府甲子祭天
丁卯幸人皇王宮己巳安邊鄭頡定理三府叛遣安端討之丁丑三府平壬午安端
獻俘誅安邊府叛帥二人癸未宴東丹國僚佐頒賜有差甲申幸天福城乙酉班師
以大誣譖舉族行夏四月丁亥朔次繖子山辛卯人皇王率東丹國僚屬辭是月唐
養子李嗣源反郭存謙弑其主存勗嗣源遂卽位五月辛酉南海定理二府復叛大
元帥堯骨討之六月丁酉二府平丙午次慎州唐遣姚坤以國哀來告秋七月丙辰

鐵州刺史衛鈞反乙丑堯骨攻拔鐵州庚午東丹國左大相迭剌卒辛未衛送大誣
譖于皇都西築城以居之賜諱譖名曰烏魯古妻曰阿里只盧龍行軍司馬張崇叛
奔唐甲戌次扶餘府上不豫是夕大星隕于幄前辛巳平旦子城上見黃龍繚繞可
長一里光耀奪目入于行宮有紫黑氣蔽天踰日乃散是日上崩年五十五天贊三
年上所謂丙戌秋初必有歸處至是乃驗壬午皇后稱制權決軍國事八月辛卯康
默記等攻下長嶺府甲午皇后奉梓宮西遷壬寅堯骨討平諸州奔赴行在乙巳人
皇王倍繼至九月壬戌南府宰相蘇薨丁卯梓宮至皇都權殯于子城西北己巳上
諡昇天皇帝廟號太祖冬十月盧龍軍節度使盧國用叛奔于唐十一月丙寅殺南
院夷离堇耶律迭里郎君耶律匹魯等二年八月丁酉葬太祖皇帝于祖陵置祖州
天城軍節度使以奉陵寢統和二十六年七月進諡大聖大明天皇帝重熙二十一
年九月加諡大聖大明神烈天皇帝太祖所崩行宮在扶餘城西南兩河之間後建
昇天殿于此而以扶餘爲黃龍府云

天祚皇帝諱延禧字延寧小字阿果道宗之孫父順宗大孝順聖皇帝母貞順皇后蕭氏太康元年生六歲封梁王加守太尉兼中書令後三年進封燕國王大安七年總北南院樞密使事加尙書令爲天下兵馬大元帥壽隆七年正月甲戌道宗崩奉遺詔卽皇帝位于柩前羣臣上尊號曰天祚皇帝二月壬辰朔改元乾統大赦詔爲耶律乙辛所誣陷者復其官爵籍沒者出之流放者還之乙未遣使告哀于宋及西夏高麗乙巳以北府宰相蕭兀納爲遼興軍節度使加守太傅三月丁卯詔有司以張孝傑家屬分賜羣臣甲戌召僧法頤放戒于內庭夏四月旱六月庚寅朔如慶州甲午宋遣王潛等來弔祭丙申高麗夏國各遣使慰奠戊戌以南府宰相幹特刺兼南院樞密使庚子追諡懿德皇后爲宣懿皇后壬寅以宋魏國王和魯幹爲天下兵馬大元帥乙巳以北平郡王淳進封鄭王丁未北院樞密使耶律阿思加于越辛亥葬仁聖大孝文皇帝宣懿皇后于慶陵秋七月癸亥阻卜鐵驪來貢八月甲寅謁慶陵九月壬申謁懷陵乙亥駐蹕藕絲淀冬十月壬辰謁乾陵甲辰上皇考昭懷太子諡曰大孝順聖皇帝廟號順宗皇妣曰貞順皇后十二月戊子以樞密副使張琳知

樞密院事翰林學士張奉珪參知政事兼同知樞密院事癸巳宋遣黃實來賀卽位
丁酉高麗夏國竝遣使來賀己巳詔先朝已行事不得陳告初以楊割爲生女直部
節度使其俗呼爲太師是歲楊割死傳于兄之子烏雅束束死其弟阿骨打襲

二年春正月如鴨子河二月辛卯如春州三月大寒冰復合夏四月辛亥詔誅乙辛
黨徙其子孫于邊發乙辛得里特之墓剖棺戮屍以其家屬分賜被殺之家五月乙
丑斡特刺獻耶覲刮等部捷六月壬辰以雨罷獵駐蹕散水原丙午夏國王李乾順
復遣使請尙公主丁未南院大王陳家奴致仕壬子李乾順爲宋所攻遣李造福田
若水求援閏月庚申策賢良壬申降惠妃爲庶人秋七月獵黑嶺以霖雨給獵人馬
阻卜來侵斡特刺等戰敗之冬十月乙卯蕭海里叛劫乾州武庫器甲命北面林牙
郝家奴捕之蕭海里亡入陪尤水阿典部丙寅以南府宰相耶律斡特刺爲北院樞
密使參知政事牛溫舒知南院樞密使事十一月乙未郝家奴以不獲蕭海里免官
壬寅以上京留守耶律慎思爲北院樞密副使有司請以帝生日爲天興節

三年春正月辛巳朔如混同江女直函蕭海里首遣使來獻戊申如春州二月庚午

以武清縣大水弛其陂澤之禁夏五月戊子以獵人多亡嚴立科禁乙巳清暑赤勒嶺丙午謁慶陵六月辛酉夏國王李乾順復遣使請尙公主秋七月中京雨雹傷稼冬十月甲辰如中京己未吐蕃遣使來貢庚申夏國復遣使求援己巳有事于觀德殿十一月丙申文武百官加上尊號曰惠文智武聖孝天祚皇帝大赦以宋魏國王和魯幹爲皇太叔梁王撻魯進封燕國王鄭王淳爲東京留守進封越國王百官各進一階丁酉以惕隱耶律阿魯掃古爲南院大王戊戌以受尊號告廟乙巳謁太祖廟追尊太祖之高祖曰昭烈皇帝廟號肅祖妣曰昭烈皇后曾祖曰莊敬皇帝廟號懿祖妣曰莊敬皇后召監修國史耶律儼纂太祖諸帝實錄十二月戊申如藕絲淀是年放進士馬恭回等百三人

四年春正月戊子幸魚兒灤壬寅獵木嶺癸卯燕國王撻魯薨二月丁丑鼻骨德遣使來貢夏六月甲辰駐蹕旺國崖甲寅夏國遣李造福田若水求援癸亥吐蕃遣使來貢秋七月南京蝗庚辰獵南山癸未以西北路招討使蕭得里底北院樞密副使耶律慎思竝知北院樞密使事辛卯以同知南院樞密使事蕭敵里爲西北路招討

使冬十月己酉鳳凰見于灑陰己未幸南京十一月乙亥御迎月樓賜貧民錢十二月辛丑以張琳爲南府宰相

五年春正月乙亥夏國遣李造福等來求援且乞伐宋庚寅以遼興軍節度使蕭常哥爲北府宰相丁酉遣樞密直學士高端禮等諷宋罷伐夏兵二月癸卯微行視民疾苦丙午幸鴛鴦灤三月壬申以族女南仙封成安公主下嫁夏國王李乾順夏四月甲申射虎炭山五月癸卯清暑南崖壬子宋遣曾孝廣王戩報聘六月甲戌夏國遣使來謝及貢方物己丑幸侯里吉秋七月謁慶陵九月辛亥駐蹕藕絲淀乙卯謁乾陵冬十一月戊戌禁商賈之家應進士舉丙辰高麗三韓國國王顒薨子俛遣使來告十二月己巳夏國復遣李造福田若水求援癸酉宋遣林洙來議與夏約和六年春正月辛丑遣知北院樞密使蕭得里底知南院樞密使事牛溫舒使宋諷歸所侵夏地夏五月清暑散水原六月辛巳夏國遣李造福等來謝秋七月癸巳阻卜來貢甲午如黑嶺庚子獵鹿角山冬十月己亥宋與夏通好遣劉正符曹穆來告庚辰以皇太叔南京留守和魯幹兼惕隱東京留守越國王淳爲南府宰相十一月乙

未以謝家奴爲南院大王馬奴爲奚六部大王丙申行柴册禮戊戌大赦以和魯幹爲義和仁聖皇太叔越國王淳進封魏國王封皇子敖盧幹爲晉王習泥烈爲饒樂郡王己亥謁太祖廟甲辰祠木葉山十二月己巳封耶律儼爲漆水郡王餘官進爵有差

七年春正月釣魚于鴨子河二月駐蹕大魚濼夏六月次散水原秋七月如黑嶺冬十月謁乾陵獵豎巫閭山是年放進士李石等百人

八年春正月如春州夏四月丙申封高麗王俟爲三韓國公贈其父頤爲高麗國王五月清暑散水原六月壬辰西北路招討使蕭敵里率諸蕃來朝丙申射柳祈雨壬寅夏國王李乾順以成安公主生子遣使來告丁未如黑嶺秋七月戊辰以雨罷獵冬十二月己卯高麗遣使來謝

九年春正月丙午朔如鴨子河二月如春州三月戊午夏國以宋不歸地遣使來告夏四月壬午五國部來貢六月乙亥清暑特禮嶺秋七月隕霜傷稼甲寅獵于侯里吉八月丁酉雪罷獵冬十月癸酉望祀水葉山丁丑詔免今年租稅十二月甲申高

麗遣使來貢是年放進士劉禎等九十人

十年春正月辛丑預行立春禮如鴨子河二月庚午朔駐蹕大魚灤夏四月丙子五國部長來貢丙戌預行再生禮癸巳獵于北山六月甲戌清暑玉丘癸未夏國遣李造福等來貢甲午阻卜來貢秋七月辛丑謁慶陵閏月辛亥謁懷陵己未謁祖陵壬戌皇太叔和魯幹薨九月甲戌免重九節禮冬十月駐蹕藕絲淀十二月己酉改明年元是歲大饑

天慶元年春正月釣魚于鴨子河二月如春州三月乙亥五國部長來貢夏五月清暑散水原秋七月獵冬十月駐蹕藕絲淀

二年春正月己未朔如鴨子河丁丑五國部長來貢二月丁酉如春州幸混同江釣魚界外生女直酋長在千里內者以故事皆來朝適遇頭魚宴酒半酣上臨軒命諸酋次第起舞獨阿骨打辭以不能諭之再三終不從他日上密謂樞密使蕭舉先曰前日之燕阿骨打意氣雄豪顧視不常可託以邊事誅之否則必貽後患奉先曰麗人不知禮義無大過而殺之恐傷向化之心假有異志又何能爲其弟吳乞買粘罕

胡舍等嘗從獵能呼鹿刺虎搏熊上喜輒加官爵夏六月庚寅清暑南崖甲午和州
回鶻來貢戊戌成安公主來朝甲辰阻卜來貢秋七月乙丑獵南山九月己未射獲
熊燕羣臣上親御琵琶初阿骨打混同江宴歸疑上知其異志遂稱兵先併旁近部
族女直趙三阿鶻產拒之阿骨打虜其家屬二人走訴咸州詳穩司送北樞密院樞
密使蕭奉先作常事以聞上仍送咸州詰責欲使自新後數召阿骨打竟稱疾不至
冬十月辛亥高麗三韓國公王俛之母死來告卽遣使致祭起復是月駐蹕奉聖州
十一月乙卯幸南京丁卯謁太祖廟是年放進士韓昉等七十七人三年春正月丙
寅賜南京貧民錢丁卯如大魚灤甲戌禁僧尼破戒丙子獵狗牙山大寒獵人多死
三月籍諸道戶徙大牢古山圍場地居民于別土阿骨打一日率五百騎突至咸州
吏民大驚翌日赴詳穩司與趙三等面折庭下阿骨打不屈送所司問狀一夕遁去
遣人訴于上謂詳穩司欲見殺故不敢留自是召不復至夏閏四月李弘以左道聚
衆爲亂支解分示五京六月乙卯斡朗改國遣使來貢良犬丙辰夏國遣使來貢秋
七月幸秋山九月駐蹕藕絲淀十一月甲午以三司使虞融知南院樞密使事西南

面招討使蕭樂古爲南府宰相十二月庚戌高麗遣使來謝致祭癸丑回鶻遣使來貢甲寅以樞密直學士馬人望參知政事丙辰知樞密院事耶律儼薨癸亥高麗遣使來謝起復

四年春正月如春州初女直起兵以紇石烈部人阿疎不從遣其部撒改討之阿疎弟狄故保來告詔諭使勿討不聽阿疎來奔至是女直遣使來索不發夏五月清暑散水原秋七月女直復遣使取阿疎不發乃遣侍御阿息保問境上多建城堡之故女直以慢語答曰若還阿疎朝貢如故不然城未能已遂發渾河北諸軍益東北路統軍司阿骨打乃與弟粘罕胡舍等謀以銀朮割移烈婁室闍母等爲帥集女直諸部兵擒遼障鷹官及攻寧江州東北路統軍司以聞時上在慶州射鹿聞之略不介意遣海州刺史高仙壽統渤海軍應援蕭撻不也遇女直戰于寧江東敗績十月壬寅以守司空蕭嗣先爲東北路都統靜江軍節度使蕭撻不也爲副發契丹奚軍三千人中京禁兵及土豪二千人別選諸路武勇二千餘人以虞候崔公義爲都押官控鶴指揮邢穎爲副引軍屯出河店兩軍對壘女直軍潛渡混同江掩擊遼衆蕭嗣

先軍潰崔公義邢穎耶律佛留蕭葛十等死之其獲免者十有七人蕭奉先懼其弟嗣先獲罪輒奏東征潰軍所至劫掠若不肆赦恐聚爲患上從之嗣先但免官而已諸軍相謂曰戰則有死而無功退則有生而無罪故士無鬪志望風奔潰十一月壬辰都統蕭敵里等營于斡鄰灤東又爲女直所襲士卒死者甚衆甲午蕭敵里亦坐免官辛丑以西北路招討使耶律斡里朶爲行軍都統副點檢蕭乙薛同知南院樞密使事耶律章奴副之十二月咸賓祥三州及鐵驪兀惹皆叛入女直乙薛往援賓州南軍諸將實婁特烈等往援咸州竝爲女直所敗

五年春正月下詔親征遣僧家奴持書約和斥阿骨打名阿骨打遣賽刺復書若歸叛人阿疎遷黃龍府於別地然後議之都統耶律斡里朶等與女直兵戰于達魯古城敗績二月饒州渤海古欲等反自稱大王三月以蕭謝佛留等討之遣耶律張家奴等六人齎書使女直斥其主名冀以速降夏四月癸丑蕭謝佛留等爲渤海古欲所敗以南面副部署蕭陶蘇斡爲都統赴之五月陶蘇斡及古欲戰敗績張家奴等以阿骨打書來復遣之往六月己亥朔清暑特禮嶺壬子張家奴等還阿骨打復書

亦斥名諭之使降癸丑以親征諭諸道丙辰陶蘇幹招獲古欲等癸亥以惕隱耶律末里爲北院大王是月遣蕭辭刺使女直以書辭不屈見留秋七月辛未宋遣使致助軍銀絹丙子獵于嶺東是月都統幹里朶等與女直戰于白馬濼敗績八月甲子罷獵趨軍中以幹里朶等軍敗免官丙寅以圍場使阿不爲中軍都統耶律張家奴爲都監率番漢兵十萬蕭奉先充御營都統諸行營都部署耶律章奴爲副以精兵二萬爲先鋒餘分五部爲正軍貴族子弟千人爲硬軍扈從百司爲護衛軍北出駱駝口以都點檢蕭胡覩姑爲都統樞密直學士柴誼爲副將漢步騎三萬南出寧江州自長春州分道而進發數月糧期必滅女直九月丁卯朔女直軍陷黃龍府己巳知北院樞密使蕭得里底出爲西南面招討使辭刺還女直復遣賽刺以書來報若歸我叛人阿疎等卽當班師上親征粘罕兀朮等以書來上陽爲卑哀之辭實欲求戰書上上怒下詔有女直作過大軍翦除之語女直主聚衆擄面仰天慟哭曰始與汝等起兵蓋苦契丹殘忍欲自立國今主上親征奈何非人死戰莫能當也不若殺我一族汝等迎降轉禍爲福諸軍皆曰事已至此惟命是從乙巳耶律章奴反奔上

京謀迎立魏國王淳上遣駙馬蕭昱領兵詣廣平淀護后妃行宮小底乙信持書馳報魏國王時章奴先遣王妃親弟蕭諦里以所謀說魏國王王曰此非細事主上自有諸王當立北南面大臣不來而汝言及此何也密令左右拘之有頃乙信等齎御札至備言章奴等欲廢立事魏國王立斬蕭諦里等首以獻單騎間道詣廣平淀得罪上遇之如初章奴知魏國王不聽率麾下掠慶曉懷祖等州結渤海羣盜衆至數萬趨廣平淀犯行宮順國女直阿鶻產以三百騎一戰而勝擒其貴族二百餘人竝斬首以徇其妻子配役繡院或散諸近侍爲婢餘得脫者皆奔女直章奴詐爲使者欲奔女直爲邏者所獲縛送行在腰斬于市剖其心以獻祖廟支解以徇五路冬十一月遣駙馬蕭特末林牙蕭察刺等將騎兵五萬步卒四十萬親軍七十萬至駝門十二月乙巳耶律張家奴叛戊申親戰于護步答岡敗績盡亡其輜重己未錦州刺史耶律朮者叛應張家奴庚申北面林牙耶律馬哥討張家奴癸亥以北院宣徽使蕭韓家奴知北院樞密使事南院宣徽使蕭特末爲漢人行宮都部署

六年春正月丙寅朔東京夜有惡少年十餘人乘酒執刃踰垣入留守府問留守蕭

保先所在今軍變請爲備蕭保先出刺殺之戶部使大公鼎聞亂卽攝留守事與副留守高清明集奚漢兵千人盡捕其衆斬之撫定其民東京故渤海地太祖力戰二十餘年乃得之而蕭保先嚴酷北海苦之故有是變其裨將渤海高永昌僭號稱隆基元年遣蕭乙薛高興順招之不從閏月己亥遣蕭韓家奴張琳討之戊午貴德州守將耶律余覲以廣州渤海叛附永昌我師擊敗之二月戊辰侍御司徒撻不也等討張家奴戰于祖州敗績乙酉遣漢人行宮都部署蕭特末率諸將討張家奴戊子張家奴誘饒州渤海及中京賊侯概等萬餘人攻陷高州三月東面行軍副統酬幹等擒侯概于川州夏四月戊辰親征張家奴癸酉敗之甲戌誅叛黨饒州渤海平丙子賞平賊將士有差而蕭韓家奴張琳等復爲賊所敗五月清暑散水原女直軍攻下瀋州復陷東京擒高永昌東京州縣族人痕孛鐸刺吳十撻不也道刺酬幹等十人皆降女直六月乙丑籍諸路兵有雜畜十頭以上者皆從軍庚辰魏國王淳進封秦晉國王爲都元帥上京留守蕭撻不也爲契丹行宮都部署兼副元帥丁亥知北院樞密使事蕭韓家奴爲上京留守秋七月獵秋山春州渤海二千餘戶叛東北

路統軍使勒兵追及盡俘以還八月烏古部叛遣中丞耶律撻不也等招之九月丙午謁懷陵冬十月丁卯以張琳軍敗奪官庚辰烏古部來降十一月東面行軍副統馬哥等攻曷蘇館敗績十二月乙亥封庶人蕭氏爲太皇太妃辛巳削副統耶律馬哥官

七年春正月甲寅減旣馬粟分給諸局是月女直軍攻春州東北面諸軍不戰自潰女古皮室四部及渤海人皆降復下泰州二月涑水縣賊董龐兒聚衆萬餘西京留守蕭乙薛南京統軍都監查刺與戰于易水破之三月龐兒黨復聚乙薛復擊破之于奉聖州夏五月庚寅東北面行軍諸將涅里合魯涅哥虛古等棄市乙巳諸圍場隙地縱百姓樵採六月辛巳以同知樞密院事余里也爲北院大王秋七月癸卯獵秋山八月丙寅獵狝斯那里山命都元帥秦晉王赴沿邊會四路兵馬防秋九月上自燕至陰涼河置怨軍八營募自宜州者曰前宜後宜自錦州者曰前錦後錦自乾自顯者曰乾曰顯又有乾顯大營巖州營凡二萬八千餘人屯衛州蒺藜山丁酉獵鞞子山冬十月乙卯朔至中京十二月丙寅都元帥秦晉國王淳遇女直軍戰于蒺

藜山敗績女直復拔顯州旁近州郡庚午下詔自責癸酉遣夷離畢查刺與大公鼎諸路募兵丁丑以西京留守蕭乙薛爲北府宰相東北路行軍都統奚霞末知奚六部大王事是歲女直阿骨打用鐵州楊朴策卽皇帝位建元天輔國號金楊朴又言自古英雄開國或受禪必先求大國封册遂遣議和以求封册

八年春正月幸鴛鴦灤丁亥遣耶律奴哥等使金議和庚寅保安軍節度使張崇以雙州二百戶降金東路諸州盜賊蜂起掠民自隨以充食二月耶律奴哥還自金金主復書曰能以兄事朕歲貢方物歸我上中京興中府三路州縣以親王公主駙馬大臣子孫爲質還我行人及元給信符并宋夏高麗往復書詔表牒則可以如約三月甲午復遣奴哥使金夏四月辛酉以西南面招討使蕭得里底爲北院樞密使五月壬午朔奴哥以書來約不踰此月見報戊戌復遣奴哥使金要以酌中之議是月至納葛灤賊安生兒張高兒聚衆二十萬耶律馬哥等斬生兒于龍化州高兒亡入懿州與霍六哥相合金主遣胡突袞與奴哥持書報如前約六月丁卯遣奴哥等齎宋夏高麗書詔表牒至金霍六哥陷海北州趣義州軍帥回離保等擊敗之通祺雙

遼四州之民八百餘戶降于金秋七月獵秋山金復遣胡突衰來免取質子及上京
興中府所屬州郡裁減歲幣之數如能以兄事朕冊用漢儀可以如約八月庚午遣
奴哥突迭使金議冊禮九月突迭見留遣奴哥還謂之曰言如不從勿復遣使閏月
丙寅遣奴哥復使金而蕭寶訛里等十五人各率戶降于金冬十月奴哥突迭持金
書來龍化州張應古等四人率衆降金十一月副元帥蕭撻不也薨十二月甲申議
定冊禮遣奴哥使金寧昌軍節度使劉宏以懿州戶三千降金時山前諸路大饑乾
顯宜錦興中等路斗粟直數緡民削榆皮食之既而人相食是年放進士王翬等百
三人

九年春正月金遣烏林答贊謨持書來迎冊二月至鴛鴦灤賊張撒八誘中京射糧
軍僭號南面軍帥余覲擒撒八三月丁未朔遣知右夷离畢事蕭習泥烈等冊金主
爲東懷國皇帝己酉烏林答贊謨奴哥等先以書報夏五月阻卜補疎只等叛執招
討使耶律斡里朶都監蕭斜里得死之秋七月獵南山金復遣烏林答贊謨來責冊
文無兄事之語不言大金而云東懷乃小邦懷其德之義及冊文有渠材二字語涉

輕侮若遙芬多馘等語皆非善意殊乖體式如依前書所定然後可從楊詢卿羅子
韋率衆降金八月以趙王習泥烈爲西京留守九月至西京復遣習泥烈楊立忠先
持册藁使金冬十月甲戌朔耶律陳圖奴等二十餘人謀反伏誅是月遣使送烏林
答贊謀持書以還

十年春二月幸鴛鴦灤金復遣烏林答贊謀持書及册文副本以來仍責乞兵于高
麗三月己酉民有羣馬者令取其一給東路軍庚申以金人所定大聖二字與先世
稱號同復遣習泥烈往議金主怒遂絕之夏四月獵胡土白山聞金師再舉耶律白
斯不等選精兵三千以濟遼師五月金主親攻上京克外郭留守撻不也率衆出降
六月乙酉以北府宰相蕭乙薛爲上京留守知鹽鐵內省兩司東北統軍司事秋獵
沙嶺冬復至西京

保大元年春正月丁酉朔改元肆赦初金人興兵郡縣所失幾半上有四子長趙王
母趙昭容次晉王母文妃次秦王許王皆元妃生國人知晉王之賢深所屬望元妃
之兄樞密使蕭奉先恐秦王不得立潛圖之文妃姊妹三人長適耶律撻曷里次文

妃次適余覲一日其姊若妹俱會軍前奉先諷人誣駙馬蕭昱及余覲等謀立晉王
事覺昱撻曷里等伏誅文妃亦賜死獨晉王未忍加罪余覲在軍中聞之大懼卽率
千餘騎叛入金上遣知奚王府事蕭遐買北府宰相蕭德恭太常袞耶律諦里姑歸
州觀察使蕭和尚奴四軍太師蕭幹將所部兵追之及諸閭山縣諸將議曰主上信
蕭奉先言奉先視吾輩蔑如也余覲乃宗室豪俊常不肯爲奉先下若擒余覲他日
吾黨皆余覲也不若縱之還卽給曰追襲不及奉先旣見余覲之亡恐後日諸校亦
叛遂勸驟加爵賞以結衆心以蕭遐買爲奚王蕭德恭試中書門下平章事兼判上
京留守事耶律諦里姑爲龍虎衛上將軍蕭和尚奴金吾衛上將軍蕭幹鎮國大將
軍二月幸鴛鴦灤夏五月至曷里城秋七月獵炭山九月至南京冬十一月癸亥以
西京留守趙王習泥烈爲惕隱

二年春正月乙亥金克中京進下澤州上出居庸關至鴛鴦灤聞余覲引金人婁室
孛堇奄至蕭奉先曰余覲乃王子班之苗裔此來欲立甥晉王耳若爲社稷計不惜
一子明其罪誅之可不戰而余覲自迴矣上遂賜晉王死素服三日耶律撒八等皆

伏誅王素有人望諸軍聞其死無不流涕由是人心解體余覩引金人逼行宮上率衛兵五千餘騎幸雲中遺傳國璽于桑乾河二月庚寅朔日有食之既甲午知北院大王事耶律馬哥漢人行宮都部署蕭特末竝爲都統大和宮使耶律補得副之將兵屯鴛鴦灤己亥金師敗奚王霞末于北安州遂降其城三月辛酉上聞金師將出嶺西遂趨白水灤乙丑羣牧使謨魯幹降金丙寅上至女古底倉聞金兵將近計不知所出乘輕騎入夾山方悟奉先之不忠怒曰汝父子誤我至此今欲誅汝何益于事恐軍心忿怨爾曹避敵苟安禍必及我其勿從行奉先下馬哭拜而去行未數里左右執其父子縛送金兵金人斬其長子昂以奉先及其次子昱械送金主道遇遼軍奪以歸國遂竝賜死逐樞密使蕭得里底召撻不也典禁衛丁卯以北院樞密副使蕭僧孝奴知北院樞密使事同知北院樞密使事蕭查刺爲左夷離畢戊辰同知殿前點檢事耶律高八率衛士降金己巳偵人蕭和尙牌印耶律晒斯爲金師所獲癸酉以諸局百工多亡凡扈從不限吏民皆官之初詔留宰相張琳李處溫與秦晉國王淳守燕處溫聞上入夾山數日命令不通卽與弟處能子爽外假怨軍內

結都統蕭幹謀立淳遂與諸大臣耶律大石左企弓虞仲文曹勇義康公弼集蕃漢百官諸軍及父老數萬人詣淳府處溫邀張琳至白其事琳曰攝政則可處溫曰天意人心已定請立班耳處溫等請淳受禮淳方出李爽持赭袍被之令百官拜舞山呼淳驚駭再三辭不獲已而從之以處溫守太尉左企弓守司徒曹勇義知樞密院事虞仲文參知政事張琳守太師李處能直樞密院李爽爲少府少監提舉翰林醫官李爽陳秘十餘人曾與大計竝賜進士及第授官有差蕭幹爲北樞密使駙馬都尉蕭旦知樞密院事改怨軍爲常勝軍於是肆赦自稱天錫皇帝改元建福降封天祚爲湘陰王遂據有燕雲平及上京遼西六路天祚所有沙漠已北西南西北路兩都招討府諸蕃部族而已夏四月辛卯西南面招討使耶律佛頂降金雲內寧邊東勝等州皆降阿疎爲金兵所擒金已取西京沙漠以南部族皆降上遂遁於訛莎烈時北部謨葛失驢馬馳食羊五月甲戌都統馬哥收集散亡會于漚里謹丙子以馬哥知北院樞密使事兼都統六月淳寢疾聞上傳檄天德雲內朔武應蔚等州合諸蕃精兵五萬騎約以八月入燕并遣人問勞索衣裘茗藥淳甚驚命南北面大臣議

而李處溫蕭幹等有迎秦拒湘之說集蕃漢百官議之從其議者東立惟南面行營都部署耶律寧西立處溫等問故寧曰天祚果能以諸蕃兵大舉奪燕則是天數未盡豈能拒之否則秦湘父子也拒則皆拒自古安有迎子而拒其父者處溫等相顧微笑以寧扇亂軍心欲殺之淳欵枕長歎曰彼忠臣也焉可殺天祚果來吾有死耳復何面目相見耶已而淳死衆乃議立其妻蕭氏爲皇太后主軍國事奉遺命迎立天祚次子秦王定爲帝太后遂稱制改元德興處溫父子懼禍南通童貫欲挾蕭太后納土于宋北通于金欲爲內應外以援立大功自陳蕭太后罵曰誤秦晉國王者皆汝父子悉數其過數十賜死斃其子爽而磔之籍其家得錢七萬緡金玉寶器稱是爲宰相數月之間所取也謨葛失以兵來援爲金人敗于洪灰水擒其子陀古及其屬阿敵音夏國援兵至亦爲金所敗秋七月丁巳朔敵烈部皮室叛烏古部節度使耶律棠古討平之加太子太保乙丑上京毛八十率二千戶降金辛未夏國遣曹佺來問起居八月戊戌親遇金軍戰于石輦驛敗績都統蕭特末及其姪撒古被執辛丑會軍于歡撻新查刺金兵追之急棄輜重以遁九月敵烈部叛都統馬哥克之

冬十月金兵攻蔚州降十一月乙丑聞金兵至奉聖州遂率衛兵屯于落昆髓秦晉王淳妻蕭德妃五表于金求立秦王不許以勁兵守居庸及金兵臨關厓石自崩戍卒多壓死不戰而潰德妃出古北口趨天德軍十二月知金主撫定南京上遂由埽里關出居四部族詳穩之家

三年春正月丁巳奚王回离保僭號稱天復元年命都統馬哥討之甲子初張穀爲遼興軍節度副使民推穀領州事秦晉王淳旣死蕭德妃遣時立愛知平州穀知遼必亡練兵畜馬籍丁壯爲備立愛至穀弗納金帥粘罕入燕首問平州事於故參知政事康公弼公弼曰穀狂妄寡謀雖有鄉兵彼何能爲示之不疑圖之未晚金人招時立愛赴軍前加穀臨海軍節度使仍知平州旣而又欲以精兵三千先下平州擒張穀公弼曰若加兵是趣之叛也公弼請自往覘之穀謂公弼曰遼之八路七路已降獨平州未解甲者防蕭幹耳厚賂公弼而還公弼復粘罕曰彼無足慮金人遂改平州爲南京加穀試中書門下平章事判留守事庚辰宜錦乾顯成川豪懿等州相繼皆降上京盧彥綸叛殺契丹人二月乙酉朔與中府降金來州歸德軍節度使田

顯權隰州刺史杜師回權遷州刺史高永昌權閏州刺史張成皆籍所管戶降金丙
戊誅蕭德妃降淳爲庶人盡釋其黨癸巳興中宜州復城守三月駐蹕于雲內州南
夏四月甲申朔以知北院樞密使蕭僧孝奴爲諸道大都督丙申金兵至居庸關擒
耶律大石戊戌金兵圍輜重于青塚硬寨太保特母哥竊梁王雅里以遁秦王許王
諸妃公主從臣皆陷沒庚子梁宋大長公主特里亡歸壬寅金遣人來招癸卯答言
請和丙午金兵送族屬輜重東行乃遣兵邀戰于白水灤趙王習泥烈蕭道寧皆被
執上遣牌印耶君謀盧瓦送兔紐金印僞降遂西遁雲內駙馬都尉乳奴詣金降己
酉金復以書來招答其書壬子金帥書來不許請和是月特母哥挈雅里至上怒不
能盡救諸子詰之五月乙卯夏國王李乾順遣使請臨其國庚申軍將耶律敵烈等
夜劫梁王雅里奔西北部立以爲帝改元神歷辛酉渡河止于金肅軍北回离保爲
衆所殺六月遣使册李乾順爲夏國皇帝秋九月耶律大石自金來歸冬十月復渡
河東還居突呂不部梁王雅里歿耶律尤烈繼之十一月突烈爲衆所殺

四年春正月上趨都統馬哥軍金人來攻棄營北遁馬哥被執謨葛失來迎驢馬馳

羊又率部人防衛時侍從乏糧數日以衣易羊至烏古敵烈部以都點檢蕭乙薛知北院樞密使事封謨葛失爲神于越王特母哥降金二月耶律遙設等十人謀叛伏誅夏五月金人既克燕驅燕之大家東徙以燕空城及涿易檀順景薊州與宋以塞盟左企弓康公弼曹勇義虞仲文皆東遷燕民流離道路不勝其苦入平州言於留守張穀曰宰相左企弓不謀守燕使吾民流離無所安集公今臨巨鎮握強兵盡忠於遼必能使我復歸鄉土人心亦惟公是望穀遂召諸將領議皆曰聞天祚兵勢復振出沒漠南公若仗義勤王奉迎天祚以圖中興先責左企弓等叛降之罪而誅之盡歸燕民使復其業而以平州歸宋則宋無不接納平州遂爲藩鎮矣卽後日金人加兵內用平山之軍外得宋爲之援又何懼焉穀曰此大事也不可草草翰林學士李石智而多謀可召與議石至其言與之合乃遣張謙率五百餘騎傳留守令召宰相左企弓曹勇義樞密使虞仲文叅知政事康公弼至灤河西岸遣議事官趙秘校往數十罪曰天祚播遷夾山不卽奉迎一也勸皇叔秦晉王僭號二也詆訐君父降封湘陰三也天祚遣知閣王有慶來議事而殺之四也檄書始至有迎秦拒湘之議

五也不謀守燕而降六也不顧大義臣事于金七也根括燕財取悅于金八也使燕人遷徙失業九也教金人發兵先下平州十也爾有十罪所不容誅左企弓等無以對皆縊殺之仍稱保大三年畫天祚象朝夕謁事必告而後行稱遼官秩六月榜諭燕人復業恒產爲常勝軍所占者悉還之燕民旣得歸大悅翰林學士李石更名安弼偕故三司使高黨往燕山說宋王安中曰平州帶甲萬餘穀有文武材可用爲屏翰不然將爲肘腋之患安中深然之令安弼與黨詣宋主詔帥臣王安中詹度厚加安撫與免三年常賦穀聞之自謂得計秋七月金人屯來州闔母聞平州附宋以二千騎問罪先入營州穀以精兵萬騎擊敗之宋建平州爲泰寧軍以穀爲節度使以安弼黨爲徽猷閣待制令宣撫司出銀絹數萬犒賞穀喜遠迎金人謀知舉兵來襲穀不得歸奔燕金人克三州始來索穀王安中諱之索急斬一人貌類者去金人曰非穀也以兵來取安中不得已殺穀函其首送金天祚旣得林牙耶律大石兵歸又得陰山室韋謨葛失兵自謂得天助再謀出兵復收燕雲大石林牙力諫曰自金人初陷長春遼陽則車駕不幸廣平淀而都中京及陷上京則都燕山及陷中京則

幸雲中自雲中而播遷夾山向以全師不謀戰備使舉國漢地皆爲金有國勢至此而方求戰非計也當養兵待時而動不可輕舉不從大石遂殺乙薛及坡里括置北南面官屬自立爲王率所部西去上遂率諸軍出夾山下漁陽嶺取天德東勝寧邊雲內等州南下武州遇金人戰于奄遏下水復潰直趨山陰八月國舅詳穩蕭撻不也筆硯祇候察刺降金是月金主阿骨打死九月建州降金冬十月納突呂不部人訛哥之妻諳葛以訛哥爲本部節度使昭古牙率衆降金金攻興中府降之十一月從行者舉兵亂北護衛太保朮者舍利詳穩牙不里等擊敗之十二月置二總管府五年春正月辛巳党項小斛祿遣人請臨其地戊子趨天德過沙漠金兵忽至上徒步出走近侍進珠帽却之乘張仁貴馬得脫至天德己丑遇雪無禦寒具朮者以貂裘帽進途次絕糧朮者進麩與棗欲憩朮者卽跪坐倚之假寐朮者輩惟齧冰雪以濟饑過天德至夜將宿民家給曰偵騎其家知之乃叩馬首跪而大慟潛宿其家居數日嘉其忠遙授以節度使遂趨党項以小斛祿爲西南面招討使總知軍事仍賜其子及諸校爵賞有差二月至應州新城東六十里爲金人完顏婁室等所獲八月

癸卯至金丙午降封海濱王以疾終年五十有四在位二十四年金皇統元年二月改封豫王五年葬于廣寧府閭陽縣乾陵傍耶律淳者世號爲北遼淳小字涅里興宗第四孫南京留守宋魏王和魯幹之子清寧初太后鞠育之既長篤好文學昭懷太子得罪上欲以淳爲嗣上怒耶律白斯不知與淳善出淳爲彰聖等軍節度使天祚卽位進王鄭乾統二年加越王六年拜南府宰相首議制兩府禮儀上喜徙王魏其父和魯幹薨卽以淳襲父守南京冬夏入朝寵冠諸王天慶五年東征都監章奴濟鴨子河與淳子阿撒等三百餘人亡歸先遣敵里等以廢立之謀報淳淳斬敵里首以獻進封秦晉國王拜都元帥賜金券免漢拜禮不名許自擇將士乃募燕雲精兵東至錦州隊長武朝彥作亂劫淳淳匿而免收朝彥誅之會金兵至聚兵戰于阿里軫斗敗績收亡卒數千人拒之淳入朝釋其罪詔南京刻石紀功保大二年天祚入夾山奚王回離保林牙耶律大石等引唐靈武故事議欲立淳淳不從官屬勸進曰主上蒙塵中原擾攘若不立王百姓何歸宜熟計之遂卽位百官上號天錫皇帝改保大二年爲建福元年大赦放進士李寶信等一十九人遙降天祚爲湘陰王以

燕雲平上京中京遼西六路淳主之沙漠以北南北路兩都招討府諸蕃部族等仍隸天祚自此遼國分矣封其妻普賢女爲德妃以回離保知北院樞密使事軍旅之事悉委大石又遣使報宋免歲幣結好宋人發兵問罪擊敗之尋遣使奉表于金乞爲附庸事未決淳病死年六十百官僞諡曰孝章皇帝廟號宣宗葬燕西香山永安陵遺命遙立秦王定以存社稷德妃爲皇太后稱制改建福爲德興元年放進士李球等百八人時宋兵來攻戰敗之由是人心大悅兵勢日振宰相李純等潛納宋兵居民內應抱關者被殺甚衆翌日攻內東門衛兵力戰宋軍大潰踰城而走死者相籍五表于金求立秦王不從而金兵大至德妃奔天德軍見天祚天祚怒誅德妃降淳庶人除其屬籍耶律雅里者天祚皇帝第二子也字撒鸞七歲欲立爲皇太子別置禁衛封梁王保大三年金師圍青塚寨雅里在軍中太保特母哥挾之出走間道行至陰山聞天祚失利趨雲內雅里馳赴時扈從者千餘人多於天祚天祚慮特母哥生變欲誅之責以不能全救諸王將訊之仗劍召雅里問曰特母哥教汝何爲雅里對曰無他言迺釋之天祚渡河奔夏隊帥耶律敵列等劫雅里北走至沙嶺見蛇

橫道而過識者以爲不祥後三日羣僚共立雅里爲主雅里遂卽位改元神歷命土
庶上便宜雅里性寬大惡誅殺獲亡者答之而已有自歸者卽官之因謂左右曰欲
附來歸不附則去何須威逼耶每取唐貞觀政要及林牙資忠所作治國詩令侍從
讀之烏古部節度使紮哲迭列部統軍撻不也都監突里不等各率其衆來附自是
諸部繼至而雅里日漸荒怠好擊鞠特母哥切諫乃不復出以耶律敵烈爲樞密使
特母哥副之敵烈劾西北路招討使蕭紮里熒惑衆心志有不臣與其子麻涅竝誅
之以遙設爲招討使與諸蕃戰數敗杖免官從行有疲困者輒振給之直長保德諫
曰今國家空虛賜賚若此將何以相給耶雅里怒曰昔敗於福山卿誣獵官今復有
此言若無諸部我將何取不納初令羣牧運鹽灤倉粟而民盜之議籍以償雅里乃
自爲直每粟一車償一羊三車一牛五車一馬八車一駝左右曰今一羊易粟二斗
且不可得乃償一車雅里曰民有則我有若令盡償民何堪後獵查刺山一日而射
黃羊四十狼二十一因致疾卒年三十耶律大石者世號爲西遼大石字重德太祖
八代孫也通遼漢字善騎射登天慶五年進士第擢翰林應奉尋陞承旨遼以翰林

爲林牙故稱大石林牙歷泰祥二州刺史遼興軍節度使保大二年金兵日逼天祚播越與諸大臣立秦晉王淳爲帝淳死立其妻蕭德妃爲太后以守燕及金兵至蕭德妃歸天祚天祚怒誅德妃而責大石曰我在汝何敢立淳對曰陛下以全國之勢不能一拒敵棄國遠遁使黎民塗炭卽立十淳皆太祖子孫豈不勝乞命於他人耶上無以答賜酒食赦其罪大石不自安遂殺蕭乙薛坡里括自立爲王率鐵騎二百宵遁北行三日過黑水見白達達詳穩牀古兒牀古兒獻馬四百駝二十羊若干西至可敦城駐北庭都護府會威武崇德會蕃新大林紫河馳等七州及大黃室韋敵刺王紀刺茶赤刺也喜鼻古德尼刺達刺乖達密里密兒紀合主烏古里阻卜普速完唐古忽母思奚的紉而畢十八部王衆諭曰我祖宗艱難創業歷世九主歷年二百金以臣屬逼我國家殘我黎庶屠翦我州邑使我天祚皇帝蒙塵于外日夜痛心疾首我今仗義而西欲借力諸蕃翦我仇敵復我疆宇惟爾衆亦有軫我國家憂我社稷思共救君父濟生民於難者乎遂得精兵萬餘置官吏立排甲具器仗明年二月甲午以青牛白馬祭天地祖宗整旅而西先遺書回鶻王畢勒哥曰昔我太祖皇

帝北征過卜古罕城卽遣使至甘州詔爾祖烏母主曰汝思故國耶朕卽爲汝復之
汝不能返耶朕則有之在朕猶在爾也爾祖卽表謝以爲遷國于此十有餘世軍民
皆安土重遷不能復返矣是與爾國非一日之好也今我將西至大食假道爾國其
勿致疑畢勒哥得書卽迎至邸大宴三日臨行獻馬六百騾百羊三千願質子孫爲
附庸送至境外所過敵者勝之降者安之兵行萬里歸者數國獲駝馬牛羊財物不
可勝計軍勢日盛銳氣日倍至尋思于西域諸國舉兵十萬號忽兒珊來拒戰兩軍
相望二里許諭將士曰彼軍雖多而無謀攻之則首尾不救我師必勝遣六院司大
王蕭斡里刺招討副使耶律松山等將兵二千五百攻其右樞密副使蕭刺阿不招
討使耶律木薛等將兵二千五百攻其左自以衆攻其中三軍俱進忽兒珊大敗僵
屍數十里駐軍尋思于凡九十日回回國王來降貢方物又西至起兒漫文武百官
冊立大石爲帝以甲辰歲二月五日卽位年三十八號葛兒罕復上漢尊號曰天祐
皇帝改元延慶追諡祖父爲嗣元皇帝祖母爲宣義皇后冊元妃蕭氏爲昭德皇后
因謂百官曰朕與卿等行三萬里跋涉沙漠夙夜艱勤賴祖宗之福卿等之力冒登

天位爾祖爾父宜加卹典共享尊榮自蕭幹里刺等四十九人祖父封爵有差延慶三年班師東歸馬行二十日得善地遂建都城號虎思幹耳朶改延慶爲康國元年三月以六院司大王蕭幹里刺爲兵馬都元帥敵刺部前同知樞密院事蕭查刺阿不副之茶赤刺部秃魯耶律燕山爲都部署護衛耶律鐵哥爲都監率七萬騎東征以青牛白馬祭天樹旗以誓于衆曰我大遼自太祖太宗艱難而成帝業其後嗣君耽樂無厭不恤國政盜賊蠡起天下土崩朕率爾衆遠至朔漠期復大業以光中興此非朕與爾世居之地申命元帥幹里刺曰今汝其往信賞必罰與士卒同甘苦擇善水草以立營量敵而進毋自取禍敗也行萬餘里無所得牛馬多死勒兵而還大石曰皇天弗順數也康國十年歿在位二十年廟號德宗子夷列年幼遺命皇后權國后名塔不煙號感天皇后稱制改元咸清在位七年子夷列卽位改元紹興籍民十八歲以上得八萬四千五百戶在位十三年歿廟號仁宗子幼遺詔以妹普速完權國稱制改元崇福號承天太后後與駙馬蕭朶魯不弟朴古只沙里通出駙馬爲東平王羅織殺之駙馬父幹里刺以兵圍其宮射殺普速完及朴古只沙里普速完

在位十四年仁宗次子直魯古卽位改元天禧在位三十四年時秋出獵乃蠻王屈出律以伏兵八千擒之而據其位遂襲遼衣冠尊直魯古爲太上皇皇后爲皇太后朝夕問起居以侍終焉直魯古死遼絕耶律淳在天祚之世歷王大國受賜金券贊拜不名一時恩遇無與爲比當天祚播越以都元帥留守南京獨不可奮大義以激燕民及諸大臣興勤王之師東拒金而迎天祚乎乃自取之是篡也況忍王天祚哉大石旣帝淳而王天祚矣復歸天祚天祚責以大義乃自立爲王而去之幸藉祖宗餘威遺智建號萬里之外雖寡母弱子更繼迭承幾九十年亦可謂難矣然淳與雅里大石之立皆在天祚之世有君而復君之其可乎哉諸葛武侯爲獻帝發喪而後立先主爲帝者不可同年語矣故著以爲戒云

耶律曷魯

遼史

耶律曷魯字控溫一字洪隱迭刺部人祖匣馬葛簡憲皇帝兄父偶思遙輦時爲本部夷离董曷魯其長子也性質厚在髻髻與太祖遊從父釋魯奇之曰興我家者必二兒也太祖旣長相與易裘馬爲好然曷魯事太祖彌謹會滑哥弒其父釋魯太祖

顧曷魯曰滑哥弑父料我必不能容將反噬我今彼歸罪臺晒爲解我姑與之是賊
吾不忘也自是曷魯常佩刀從太祖以備不虞居久之曷魯父偶思病召曷魯曰阿
保機神略天授汝率諸弟赤心事之已而太祖來問疾偶思執其手曰爾命世奇才
吾兒曷魯者他日可委以事吾已諭之矣旣而以諸子屬之太祖爲撻馬狝沙里參
預部族事曷魯領數騎召小黃室韋來附太祖素有大志而知曷魯賢軍國事非曷
魯議不行會討越兀與烏古部曷魯爲前鋒戰有功及太祖爲迭刺部夷离堇討奚
部其長朮里徧險而壘攻莫能下命曷魯持一箭往諭之旣入爲所執迺說奚曰契
丹與奚言語相通實一國也我夷离堇於奚豈有較轢之心哉漢人殺我祖奚首夷
离堇怨次骨日夜思報漢人願力單弱使我求援於奚傳矢以示信耳夷离堇受命
於天撫下以德故能有此衆也今奚殺我違天背德不祥莫大焉且兵連禍結當自
此始豈爾國之利乎朮里感其言乃降太祖爲于越秉國政欲命曷魯爲迭刺部夷
离堇辭曰賊在君側未敢遠去太祖討黑車子室韋幽州劉仁恭遣養子趙霸率衆
來救曷魯伏兵桃山俟霸衆過半而要之與太祖合擊斬獲甚衆遂降室韋太祖會

李克用于雲州時曷魯侍克用顧而壯之曰偉男子爲誰太祖曰吾族曷魯也會遙
輦痕德董可汗歿羣臣奉遺命請立太祖太祖辭曰昔吾祖夷离董雅里嘗以不當
立而辭今若等復爲是言何歟曷魯進曰曩吾祖之辭遺命弗及符瑞未見第爲國
人所推戴耳今先君言猶在耳天人所與若合符契天不可逆人不可拂而君命不
可違也太祖曰遺命固然汝焉知天道曷魯曰聞于越之生也神光屬天異香盈幄
夢受神誨龍錫金佩天道無私必應有德我國削弱齟齬於隣部日久以故生聖人
以興起之可汗知天意故有是命且遙輦九營碁布非無可立者小大臣民屬心于
越天也昔者于越伯父釋魯嘗曰吾猶蛇兒猶龍也天時人事幾不可失太祖猶未
許是夜獨召曷魯責曰衆以遺命迫我汝不明吾心而亦俛隨耶曷魯曰在昔夷离
董雅里雖推戴者衆辭之而立阻午爲可汗相傳十餘世君臣之分亂紀綱之統隳
委質他國若綴旒然羽檄蠡午民疲奔命興王之運實在今日應天順人以答顧命
不可失也太祖乃許明日卽皇帝位命曷魯總軍國事時制度未講國用未充扈從
未備而諸弟刺葛等往往覬非望太祖宮行營始置腹心部選諸部豪健二千餘充

之以曷魯及蕭敵魯總焉已而諸弟之亂作太祖命曷魯總領軍事討平之以功爲迭刺部夷離董時民更兵焚剽日以抗敵曷魯撫輯有方畜牧盛滋民用富庶乃討烏古部破之自是震懾不敢復叛迺請制朝儀建元率百官上尊號太祖既備禮受冊拜曷魯爲阿魯敦于越阿魯敦者遼言盛名也後太祖伐西南諸夷數爲前鋒神冊二年從逼幽州與唐節度使周德威拒戰可汗州西敗其軍遂圍幽州未下太祖以時暑班師留曷魯與盧國用守之俄而救兵繼至曷魯等以軍少無援退三年七月皇都旣成燕羣臣以落之曷魯是月得疾薨年四十七旣葬賜名其阡宴答山曰于越峪詔立石紀功清寧間命立祠上京初曷魯病革太祖臨視問所欲言曷魯曰陛下聖德寬仁羣生咸遂帝業隆興臣旣蒙寵遇雖瞑目無憾惟析迭刺部議未決願亟行之及薨太祖流涕曰斯人若登三五載吾謀蔑不濟矣後太祖二十一功臣各有所擬以曷魯爲心云子惕刺撒刺俱不仕

韓延徽

遼史

韓延徽字藏明幽州安次人父夢殷累官薊儒順三州刺史延徽少英燕帥劉仁恭

奇之召爲幽都府文學平州錄事參軍同馮道祇候院授幽州觀察度支使後守光爲帥延徽來聘太祖怒其不屈留之逃律后諫曰彼秉節弗撓賢者也奈何困辱之太祖召與語合上意立命參軍事攻党項室韋服諸部落延徽之籌居多乃請樹城郭分市里以居漢人之降者又爲定配偶教墾藝以生養之以故逃亡者少居久之慨然懷其鄉里賦詩見意遂亡歸唐已而與他將王緘有隙懼及難乃省親幽州匿故人王德明舍德明問所適延徽曰吾將復走契丹德明不以爲然延徽笑曰彼失我如失左右手其見我必喜旣至太祖問故延徽曰忘親非孝棄君非忠臣雖挺身逃臣心在陛下臣是以復來上大悅賜名曰匣列匣列遼言復來也卽命爲守政事令崇文館大學士中外事悉令參決天贊四年從征渤海大誣譖乞降旣而復叛與諸將破其城以功拜左僕射又與康默記攻長嶺府拔之師還太祖崩哀動左右太宗朝封魯國公仍爲政事令使晉還改南京三司使世宗朝遷南府宰相建政事省設張理具稱盡力吏天祿三年六月河東使請行冊禮帝召延徽定其制延徽奏一遵太宗冊晉帝禮從之應歷中致事子德樞鎮東平詔許每歲東歸省九年卒年七

十八上聞震悼贈尙書令葬幽州之魯郭世爲崇文令公初延徽南奔太祖夢白鶴自帳中出比還復入帳中詰旦謂侍臣曰延徽至矣已而果然太祖初元庶事草創凡營都邑建宮殿正君臣定名分法度井井延徽力也爲佐命功臣之一子德樞德樞年甫十五太宗見之謂延徽曰是兒卿家之福朕國之寶真英物也未冠守左羽林大將軍遷特進太尉時漢人降與轉徙者多寓東平丁歲菑饑饉疾癘德樞請往撫字之授遼興軍節度使下車整紛剔蠹恩煦信孚勸農桑興教化期月民獲蘇息入爲南院宣徽使遙授天平軍節度使平灤營三州管內觀察處置等使門下平章事已而加開府儀同三司行侍中封趙國公保寧元年卒孫紹勳紹芳紹勳仕至東京戶部使會大延琳叛被執辭不屈賊以鋸解之憤罵至死紹芳重熙間參知政事加兼侍中時廷議征李元昊力諫不聽出爲廣德軍節度使聞敗嘔血卒孫資讓壽隆初拜中書侍郎平章事會宋徽宗嗣位遣使來報有司按籍有登寶位文坐是出爲崇義軍節度使改鎮遼興卒

耶律休哥

遼史

耶律休哥字遜寧祖釋魯隋國王父綰思南院夷离堇休哥少有公輔器初烏古室韋二部叛休哥從北府宰相蕭幹討之應歷末爲惕隱乾亨元年宋侵燕北院大王奚底統軍使蕭討古等敗績南京被圍帝命休哥代奚底將五院軍往救遇大敵于高粱河與耶律斜軫分左右翼擊敗之追殺三十餘里斬首萬餘級休哥被三創明日宋主遁去休哥以創不能騎輕車追至涿州不及而還是年冬上命韓匡嗣耶律沙伐宋以報圍城之役休哥率本部兵從匡嗣等戰于滿城翌日將復戰宋人請降匡嗣信之休哥曰彼衆整而銳必不肯屈乃誘我耳宜嚴兵以待匡嗣不聽休哥引兵憑高而視須臾南兵大至鼓譟疾馳匡嗣倉卒不知所爲士卒棄旗鼓而走遂敗績休哥整兵進擊敵乃却詔總南面戍兵爲北院大王車駕親征圍瓦橋關宋兵來救守將張師突圍出帝親督戰休哥斬師餘衆退走入城宋陣于水南將戰帝以休哥馬介獨黃慮爲敵所識乃賜玄甲白馬易之休哥率精騎渡水擊敗之追至莫州橫屍滿道鞍矢俱罄生獲數將以獻帝悅賜御馬金盂勞之曰爾勇過于名若人人如卿何憂不克師還拜于越聖宗卽位太后稱制令休哥總南面軍務以便宜從事

休哥均戍兵立更休法勸農桑修武備邊境大治統和四年宋復來侵其將范密楊繼業出雲州曹彬米信出雄易取岐溝涿州陷固安置屯時北南院奚部兵未至休哥力寡不敢出戰夜以輕騎出兩軍間殺其單弱以脅餘衆晝則以精銳張其勢使彼勞於防禦以疲其力又設伏林莽絕其糧道曹彬等以糧運不繼退保白溝月餘復至休哥以輕兵薄之伺彼蓐食擊其離伍單出者且戰且却由是南軍自救不暇結方陣塹地兩邊而行軍渴乏井漉淖而飲凡四日始達于涿聞太后軍至彬等冒雨而遁太后益以銳卒追及之彼力窮環糧車自衛休哥圍之至夜彬信以數騎亡去餘衆悉潰追至易州東聞宋師尙有數萬瀕沙河而纍促兵往擊之宋師望塵奔竄墮岸相蹂死者過半沙河爲之不流太后旋旆休哥收宋屍爲京觀封宋國王又上言可乘宋弱略地至河爲界書奏不納及太后南征休哥爲先鋒敗宋兵於望都時宋將劉廷讓以數萬騎並海而出約與李敬源合兵聲言取燕休哥聞之先以兵扼其要地會太后軍至接戰殺敬源廷讓走瀛州七年宋遣劉廷讓等乘暑潦來攻易州諸將憚之獨休哥率銳卒逆擊于沙河之北殺傷數萬獲輜重不可計獻于朝

太后嘉其功詔免拜不名自是宋不敢北向時宋人欲止兒啼乃曰于越至矣休哥以燕民疲弊省賦役恤孤寡戒戍兵無犯宋境雖馬牛逸于北者悉還之遠近向化邊鄙以安十六年薨是夕雨木冰聖宗詔立祠南京休哥智略宏遠料敵如神每戰勝讓功諸將故士卒樂爲之用身更百戰未嘗殺一無辜二子高八官至節度使高十終于越孫馬哥

二十四史輯要

卷之五十二 金

太祖 金史

太祖應乾興運昭德定功仁明莊孝大聖武元皇帝諱旻本諱阿骨打世祖第二子也母曰翼簡皇后拏懶氏遼道宗時有五色雲氣屢出東方大若二千斛困倉之狀司天孔致和竊謂人曰其下當生異人建非常之事天以象告非人力所能爲也咸雍四年戊申七月一日太祖生幼時與羣兒戲力兼數輩舉止端重世祖尤愛之世祖與臘醅麻產戰於野鵲水世祖被四創疾困坐太祖于膝循其髮而撫之曰此兒長大吾復何憂十歲好弓矢甫成童卽善射一日遼使坐府中顧見太祖手持弓矢使射羣鳥連三發皆中遼使矍然曰奇男子也太祖嘗宴紇石烈部活离罕家散步門外南望高阜使衆射之皆不能至太祖一發過之度所至踰三百二十步宗室謾都訶最善射遠其不及者猶百步也天德三年立射碑以識焉世祖伐卜灰太祖因辭不失請從行世祖不許而心異之烏春旣死窩謀罕請和旣請和復來攻遂圍其

城太祖年二十三被短甲免胄不介馬行圍號令諸軍城中望而識之壯士太峪乘駿馬持槍出城馳刺太祖太祖不及備舅氏活臘胡馳出其間擊太峪槍折刺中其馬太峪僅得免嘗與沙忽帶出營殺略不令世祖知之且還敵以重兵追之獨行隘巷中失道追者益急值高岸與人等馬一躍而過追者乃還世祖寢疾太祖以事如遼統軍司將行世祖戒之曰汝速了此事五月未半而歸則我猶及見汝也太祖往見曷魯騷古統軍既畢事前世祖沒一日還至家世祖見太祖來所請事皆如志喜甚執太祖手抱其頸而撫之謂穆宗曰烏雅東柔善惟此子足了契丹事穆宗亦雅重太祖出入必俱太祖遠出而歸穆宗必親迓之世祖已擒臘醅麻產尙據直屋鎧水肅宗使太祖先取麻產家屬康宗至直屋鎧水圍之太祖會軍親獲麻產獻馘於遼遼命太祖爲詳穩仍命穆宗辭不失歡都皆爲詳穩久之以偏師伐泥厖古部跋黑播立開等乃以達塗阿爲鄉導沿帥水夜行襲之虜其妻子初温都部跋忒殺唐括部跋葛穆宗命太祖伐之太祖入辭謂穆宗曰昨夕見赤祥此行必克敵遂行是歲大雪寒甚與烏古論部兵沿土温水過末鄰鄉追及跋忒於阿斯温山北灤之間

殺之軍還穆宗親迓太祖於靄建村撒改以都統伐留可謾都訶合石土門伐敵軍德撒改與將佐議或欲先平邊地部落城堡或欲徑攻留可城議不能決願得太祖至軍中穆宗使太祖往曰事必有可疑軍之未發者止有甲士七十盡以畀汝謾都訶在米里迷石罕城下石土門未到土人欲執謾都訶以與敵使來告急遇太祖於斜堆甸太祖曰國兵盡在此矣使敵先得志於謾都訶後雖種誅之何益也乃分甲士四十與之太祖以三十人詣撒改軍道遇人曰敵已據盆搨嶺南路矣衆欲由沙偏嶺往太祖曰汝等畏敵耶旣度盆搨嶺不見敵已而聞敵乃守沙偏嶺以拒我及至撒改軍夜急攻之遲明破其衆是時留可塢塔皆在遼旣破留可還攻塢塔城城中人以城降初太祖過盆搨嶺經塢塔城下從騎有後者塢塔城人攻而奪之釜太祖駐馬呼謂之曰毋取我炊食器其人謾言曰公能來此何憂不得食太祖以鞭指之曰吾破留可卽於汝乎取之至是其人持釜而前曰奴輩誰敢毀祥穩之器也遣蒲家奴招詐都詐都乃降釋之穆宗將伐蕭海里募兵得千餘人女直兵未嘗滿千至是太祖勇氣自倍曰有此甲兵何事不可圖也海里來戰與遼兵合因止遼人自

爲戰勃海留守以甲贈太祖太祖亦不受穆宗問何爲不受曰被彼甲而戰戰勝則是因彼成功也穆宗末年令諸部不得擅置信牌馳驛訊事號令自此始一皆自太祖啓之康宗七年歲不登民多流莩疆者轉而爲盜歡都等欲重其法爲盜者皆殺之太祖曰以財殺人不可財者人所致也遂減盜賊徵償法爲徵三倍民間多逋負賣妻子不能償康宗與官屬會議太祖在外庭以帛繫杖端磨其衆令曰今貧者不能自活賣妻子以償債骨肉之愛人心所同自今三年勿徵過三年徐圖之衆皆聽令聞者感泣自是遠近歸心焉歲癸巳十月康宗夢逐狼屢發不能中太祖前射中之旦日以所夢問僚佐衆曰吉兄不能得而弟得之之兆也是歲康宗卽世太祖襲位爲都勃極烈遼使阿息保來曰何以不告喪太祖曰有喪不能弔而乃以爲罪乎他日阿息保復來徑騎至康宗殯所閱贈馬欲取之太祖怒將殺之宗雄諫而止旣而遼命久不至遼主好畋獵淫酗怠于政事四方奏事往往不見省紇石烈阿疎旣奔遼穆宗取其城及其部衆不能歸遂與族弟銀朮可辭里罕陰結南江居人渾都僕速欲與俱亡入高麗事覺太祖使夾古撒喝捕之而銀朮可辭里罕先爲遼戍所

獲渾都僕速已亡去撒喝取其妻子而還二年甲午六月太祖至江西遼使使來致襲節度之命初遼每歲遣使市名鷹海東青于海上道出境內使者貪縱徵索無藝公私厭苦之康宗嘗以不遣阿疎爲言稍拒其使者太祖嗣節度亦遣蒲家奴往索阿疎故常以此二者爲言終至于滅遼然後已至是復遣宗室習古迺完顏銀朮可往索阿疎習古迺等還具言遼主驕肆廢弛之狀於是召官僚耆舊以伐遼告之使備衝要建城堡修戎器以聽後命遼統軍司聞之使節度使捏哥來問狀曰汝等有異志乎修戰具飭守備將以誰禦太祖答之曰設險自守又何問哉遼復遣阿息保來詰之太祖謂之曰我小國也事大國不敢廢禮大國德澤不施而逋逃是主以此字小能無望乎若以阿疎與我請事朝貢苟不獲已豈能束手受制也阿息保還遼人始爲備命統軍蕭撻不野調諸軍於寧江州太祖聞之使僕聒刺復索阿疎實觀其形勢僕聒刺還言遼兵多不知其數太祖曰彼初調兵豈能遽集如此復遣胡沙保往還言惟四院統軍司與寧江州軍及渤海八百人耳太祖曰果如吾言謂諸將佐曰遼人知我將舉兵集諸路軍備我必先發制之無爲人制衆皆曰善乃入見

宣靖皇后告以伐遼事后曰汝嗣父兄立邦家見可則行吾老矣無貽我憂汝必不至是也太祖感泣奉觴爲壽卽奉后率諸將出門舉觴東向以遼人荒肆不歸阿疎并己用兵之意禱於皇天后土酌畢后命太祖正坐與僚屬會酒號令諸部使婆盧火徵移懶路迪古乃兵幹魯古阿魯撫諭幹忽急賽兩路係遼籍女直實不迭往完睹路執遼障鷹官達魯古部副使辭列寧江州渤海大家奴於是達魯古部實里館來告曰聞舉兵伐遼我部誰從太祖曰吾兵雖少舊國也與汝隣境固當從我若畏遼人自往就之九月太祖進軍寧江州次寥晦城婆盧火徵兵後期杖之復遣督軍諸路兵皆會于來流水得二千五百人致遼之罪申告于天地曰世事遼國恪修職貢定烏春窩謀罕之亂破蕭海里之衆有功不省而侵侮是加罪人阿疎屢請不遣今將問罪於遼天地其鑒佑之遂命諸將傳梃而誓曰汝等同心盡力有功者奴婢部曲爲良庶人官之先有官者敘進輕重眡功苟違誓言身死梃下家屬無赦師次唐括帶幹甲之地諸軍禳射介而立有光如烈火起於人足及戈矛之上人以爲兵祥明日次扎只水光見如初將至遼界先使宗幹督士卒夷塹旣度遇渤海軍攻我

左翼七謀克衆少却敵兵直犯中軍斜也出戰哲埜先驅太祖曰戰不可易也遣宗幹止之宗幹馳出斜也前控止哲埜馬斜也遂與俱還敵人從之耶律謝十墜馬遼人前救太祖射救者斃併射謝十中之有騎突前又射之徹扎洞胸謝十拔箭走追射之中其背飲矢之半償而死獲所乘馬宗幹與數騎陷遼軍中太祖救之免胄戰或自傍射之矢拂于額太祖顧見射者一矢而斃謂將士曰盡敵而止衆從之勇氣自倍敵大奔相蹂踐死者十七八撒改在別路不及會戰使人以戰勝告之而以謝十馬賜之撒改使其子宗翰完顏希尹來賀且稱帝因勸進太祖曰一戰而勝遂稱大號何示人淺也進軍寧江州諸軍填塹攻城寧江人自東門出溫迪痕阿徒罕邀擊盡殪之十月朔克其城獲防禦使大藥師奴陰縱之使招諭遼人鐵驪部來送欵次來流域以俘獲賜將士召渤海梁福幹答刺使之僞亡去招諭其鄉人曰女直渤海本同一家我興師伐罪不濫及無辜也使完顏婁室招諭係遼籍女直師還謁宣靖皇后以所獲頒宗室耆老以實里館貲產給將士初命諸路以三百戶爲謀克十謀克爲猛安酬幹等撫定讒謀水女直鼈古酋長胡蘇魯以城降十一月遼都統蕭

虜里副都統撻不野將步騎十萬會于鴨子河北太祖自將擊之未至鴨子河旣夜太祖方就枕若有扶其首者三寤而起曰神明警我也卽鳴鼓舉燧而行黎明及河遼兵方壞陵道選壯士十輩擊走之大軍繼進遂登岸甲士三千七百至者纔三之一俄與敵遇于出河店會大風起塵埃蔽天乘風勢擊之遼兵潰逐至斡論灤殺獲首虜及車馬甲兵珍玩不可勝計徧賜官屬將士燕犒彌日遼人嘗言女直兵若滿萬則不可敵至是始滿萬云斡魯敗遼兵斬其節度使撻不野僕虺等攻賓州拔之兀惹維鶻室來降遼將赤狗兒戰于賓州僕虺渾黜敗之鐵驪王回离保以所部降吾睹補蒲察復敗赤狗兒蕭乙薛軍于祥州東斡忽急塞兩路降斡魯古敗遼軍于咸州西斬統軍婁實于陣完顏婁室克咸州是月吳乞買撒改辭不失率官屬諸將勸進願以新歲元日恭上尊號太祖不許阿离合懣蒲家奴宗翰等進曰今大功已建若不稱號無以繫天下心太祖曰吾將思之

收國元年正月壬申朔羣臣奉上尊號是日卽皇帝位上曰遼以賓鐵爲號取其堅也賓鐵雖堅終亦變壞惟金不變不壞金之色白完顏部色尙白於是國號大金改

元收國丙子上自將攻黃龍府進臨益州人走保黃龍取其餘民以歸遼遣都統耶律訛里朶左副統蕭乙薛右副統耶律張奴都監蕭謝佛留騎二十萬步卒七萬戍邊留婁室銀朮可守黃龍上率兵趨達魯古城次寧江州西遼使僧家奴來議和國書斥上名且使爲屬國庚子進師有火光正圓自空而墜上曰此祥徵殆天助也酌白水而拜將士莫不喜躍進逼達魯古城上登高望遼兵若連雲灌木狀顧謂左右曰遼兵心貳而情怯雖多不足畏遂趨高阜爲陣宗雄以右翼先馳遼左軍左軍却左翼出其陣後遼右軍皆力戰婁室銀朮可衝其中堅凡九陷陣皆力戰而出宗翰請以中軍助之上使宗幹往爲疑兵宗雄已得利擊遼右軍遼兵遂敗乘勝追躡至其營會日已暮圍之黎明遼軍潰圍出逐北至阿婁岡遼步卒盡殫得其耕具數千以給諸軍是役也遼人本欲屯田且戰且守故併其耕具獲之二月師還三月辛未朔獵于寥晦城四月遼耶律張奴以國書來上以書辭慢侮留其五人獨遣張奴回報書亦如之五月庚午朔避暑于近郊甲戌拜天射柳故事五月五日七月十五日九月九日拜天射柳歲以爲常六月己亥朔遼耶律張奴復以國書來猶斥上名

上亦斥遼主名以復之且諭之使降七月戊辰以弟吳乞買爲諳班勃極烈國相撒改爲國論勃極烈辭不失爲阿買勃極烈弟斜也爲國論勃極烈甲戌遼使辭刺以書來留之不遣九百奚營來降八月戊戌上親征黃龍府次混同江無舟上使一人道前乘赭白馬徑涉曰視吾鞭所指而行諸軍隨之水及馬腹後使舟人測其渡處深不得其底熙宗天眷二年以黃龍府爲濟州軍曰利涉蓋以太祖涉濟故也九月克黃龍府遣辭刺還遂班師至江徑渡如前丁丑至自黃龍府己卯黃龍見空中癸巳以國論勃極烈撒改爲國論忽魯勃極烈阿离合懣爲國論乙室勃極烈十一月遼主聞取黃龍府大懼自將七十萬至駝門駙馬蕭特末林牙蕭查刺等將騎五萬步四十萬至斡鄰灤上自將禦之十二月己亥行次爻刺會諸將議皆曰遼兵號七十萬其鋒未易當吾軍遠來人馬疲乏宜駐于此深溝高壘以待上從之遣迪古乃銀朮可鎮達魯古丁未上以騎兵親候遼軍獲督餉者知遼主以張奴叛西還二日矣是日上還至熟結灤有光見于矛端戊申諸將曰今遼主旣還可乘怠追擊之上曰敵來不迎戰去而追之欲以此爲勇邪衆皆悚愧願自効上復曰誠欲追敵約齋

以往無事餽饋若破敵何求不得衆皆奮躍追及遼主于護步答岡是役也兵止二萬上曰彼衆我寡兵不可分視其中軍最堅遼主必在焉敗其中軍可以得志使右翼先戰兵數交左翼合而攻之遼兵大潰我師馳之橫出其中遼師敗績死者相屬百餘里獲輿輦帑幄兵械軍資他寶物馬牛不可勝計是戰斜也援矛殺數十人阿离本被圍温迪罕迪忽迭以四謀克兵出之完顏蒙刮身被數創力戰不已功皆論最蕭特末等焚營遁去遂班師夾谷撒喝取開州婆盧火下特鄰城辭里罕降

二年正月戊子詔曰自破遼兵四方來降者衆宜加優恤自今契丹奚漢渤海係遼籍女直韋室達魯古元惹鐵驪諸部官民已降或爲軍所俘獲逃遜而還者勿以爲罪其酋長仍官之且使從宜居處閏月高永昌據東京使撻不野來求援高麗遣使來賀捷且求保州詔許自取之二月己巳詔曰比以歲凶庶民艱食多依附豪族因爲奴隸及有犯法徵償莫辦折身爲奴者或私約立限以人對贖過期則爲奴者並聽以兩人贖一爲良若元約以一人贖者卽從元約四月乙丑以幹魯統內外諸軍與蒲察迪古乃會咸州路都統幹魯古討高永昌胡沙補等被害五月幹魯等敗永

昌撻不野擒永昌以獻戮之于軍東京州縣及南路係遼女直皆降詔除遼法省稅賦置猛安謀克一如本朝之制以幹魯爲南路都統迭勃極烈阿徒罕破遼兵六萬于照散城九月己亥上獵近郊乙巳南路都統幹魯來見于婆盧買水始製金牌十二年庚申朔諳班勃極烈吳乞買及羣臣上尊號曰大聖皇帝改明年爲天輔元年四月遼秦晉國王耶律捏里來伐迪古乃婁室婆盧火將兵二萬會咸州路都統幹魯古擊之五月丁己詔自收寧江州已後同姓爲婚者杖而離之七月戊申以完顏幹論知東京事八月癸亥高麗遣使來請保州十二月甲子幹魯古等敗耶律捏里兵于疾藜山拔顯州乾懿豪徽成川惠等州皆降是月宋使登州防禦使馬政以國書來其略曰日出之分實生聖人竊聞征遼屢破勅敵若克遼之後五代時陷入契丹漢地願畀下邑

二年正月庚寅遼雙州節度使張崇降使散覩如宋報聘書曰所請之地今當與宋夾攻得者有之二月癸丑朔遼使耶律奴哥等來議和辛酉李董迪古乃婁室來見

上以遼主近在中京而敢輒來皆杖之劾里保雙古等言咸州都統斡魯古知遼主在中京而不進討芻糧豐足而不以實聞攻顯州時所獲生口財畜多自取三月癸未朔命聞哥代爲都統而翰治之斡魯古坐降謀克壬辰遼使耶律奴哥以國書來庚子以婁室言黃龍府地僻且遠宜重戍守乃命合諸路謀克以婁室爲萬戶鎮之四月辛巳遼使以國書來五月丙申命胡突哀如遼六月甲寅詔有司禁民凌虐典雇良人及倍取贖直者甲戌遼通祺雙遼等州八百餘戶來歸命分置諸部擇膏腴之地處之七月癸未詔曰匹里水路完顏朮里古渤海大家奴等六謀克貧乏之民昔嘗給以官糧置之漁獵之地今歷日已久不知登耗可具其數以聞胡突哀還自遼耶律奴哥復以國書來丙申胡突哀如遼遼戶二百來歸處之泰州詔遣阿里骨李家奴特里底招諭未降者仍詔達魯古部勃董辭列凡降附新民善爲存撫來者各令從便安居給以官糧毋輒動擾八月胡突哀還自遼耶律奴哥突迭復以國書來九月戊子詔曰國書詔令宜選善屬文者爲之其令所在訪求博學雄才之士敦遣赴闕閏月庚戌朔以降將霍石韓慶和爲千戶九百奚部蕭寶乙辛北部訛里野

漢人王六兒王伯龍契丹特末高從祐等各率衆來降遼耶律奴哥以國書來十月
癸未以龍化州降者張應古劉仲良爲千戶乙未咸州都統司言漢人李孝功渤海
二哥率衆來降命各以所部爲千戶十二月甲辰遣李董尤李以定遼地諭高麗耶
律奴哥以國書來遼懿州節度使劉宏以戶三千并執遼候人來降以爲千戶川州
寇二萬已降復叛紇石烈照里擊破之

三年正月甲寅東京人爲質者永吉等五人結衆叛事覺誅其首惡餘皆杖百沒入
在行家屬資產之半詔知東京事幹論繼有犯者並如之丙辰詔鼈古李董酬幹曰
胡魯古迭八合二部來送款若等先時不無交惡自今毋相侵擾三月耶律奴哥以
國書來四月丙子朔日有食之五月壬戌詔咸州路都統司曰兵興以前曷蘇館回
怕里與係遼籍不係遼籍女直戶民有犯罪流竄邊境或亡入于遼者本皆吾民遠
在異境朕甚憫之今旣議和當行理索可明諭諸路千戶謀克徧與詢訪其官稱名
氏地里具錄以上六月辛卯遼遣太傅習泥烈等奉冊璽來上擿冊文不合者數事
復之散覩還自宋宋使馬政及其子宏來聘散覩受宋團練使上怒杖而奪之宋使

還復遣李董辭列曷魯等如宋七月辛亥遼人楊詢卿羅子韋各率衆來降命各以所部爲謀克八月己丑頒女直字九月以遼册禮使失期詔諸路軍過江屯駐十一月習泥烈等復以國書來曷懶甸長城高麗增築三尺詔胡刺古習顯慎固營壘

四年二月辭列曷魯還自宋宋使趙良嗣王暉來議燕京西京地三月甲辰上謂羣臣曰遼人屢敗遣使求成惟飾虛辭以爲緩師之計當議進討其令咸州路統軍司治軍旅修器械具數以聞辛酉詔咸州路都統司曰朕以遼國和議無成將以四月二十五日進師令斜葛留兵一千鎮守闕毋以餘兵來會于渾河遼習泥烈以國書來四月乙未上自將伐遼以遼使習泥烈宋使趙良嗣等從行五月甲辰次渾河西使宗雄先趨上京遣降者馬乙持詔諭城中壬子至上京詔官民曰遼主失道上下同怨朕興兵以來所過城邑負固不服者卽攻拔之降者撫恤之汝等必聞之矣今爾以和好之事反覆見欺朕不欲天下生靈久罹塗炭遂決策進討比遣宗雄等相繼招諭尙不聽從今若攻之則城破矣重以弔伐之義不欲殘民故開示明詔諭以禍福其審圖之上京人恃禦備儲蓄爲固守計甲寅亟命進攻上謂習泥烈趙良嗣

等曰汝可觀我用兵以下去就上親臨城督將士諸軍特譟而進自旦及巳闔母以
麾下先登克其外城留守撻不野以城降趙良嗣等奉觴爲壽皆稱萬歲是日赦上
京官民詔諭遼副統余覲壬戌次沃黑河宗幹率羣臣諫曰地遠時暑軍馬罷乏若
深入敵境糧餽乏絕恐有後艱上從之乃班師命分兵攻慶州余覲襲闔母於遼河
完顏背答塢塔等戰却之完顏特虎死焉七月癸卯上至自伐遼九月燭隈水部實
里古達等殺孛堇酬幹僕忽得以叛十月戊辰朔日有食之戊寅命幹魯分胡刺古
烏春之兵以討實里古達十一月東京留守司乞本京官民質子增數番代上不許
曰諸質子已各受田廬若復番代則往來動搖可並仍舊十二月宋復使馬政來請
西京之地

五年春正月幹魯敗實里古達於合撻刺山誅首惡四人餘悉撫定二月遣昱及宗
雄分諸路猛安謀克之民萬戶屯泰州以婆盧火統之賜耕牛五十四月乙丑朔宗
翰請伐遼詔諸路預戒軍事五月遼都統耶律余覲等詣咸州降閏月辛巳國論胡
魯勃極烈撒改薨六月癸巳余覲與其將吏來見丙申千戶胡离答坐擅署部人爲

蒲里衍杖一百罷之庚子詔諳班勃極烈吳乞買貳國政以吳勃極烈斜也爲忽魯勃極烈蒲家奴爲吳勃極烈宗翰爲移賚勃極烈七月庚辰詔咸州都統司曰自余覩來灼見遼國事宜已決議親征其治軍以俟師期尋以連雨罷親征命吳勃極烈昱爲都統移賚勃極烈宗翰副之帥師而西十一月辛丑以忽魯勃極烈杲爲內外諸軍都統以昱宗翰宗幹宗望宗盤等副之甲辰詔曰遼政不綱人神共棄今欲中外一統故命汝率大軍以行討伐爾其慎重兵事擇用善謀賞罰必行糧餉必繼勿擾降服勿縱俘掠見可而進無淹師期事有從權毋須稟戊申詔曰若克中京所得禮樂儀仗圖書文籍並先次津發赴闕

六年正月癸酉都統杲克高恩回紇三城乙亥取中京遂下澤州二月庚寅朔日有食之己亥宗翰等敗遼奚王霞末于北安州降奚都西節度使訛里刺以本部降壬寅都統杲遣使來奏捷并獻所獲貨寶詔曰汝等提兵于外克副所任攻下城邑撫安人民朕甚嘉之所言分遣將士招降山前諸部計悉已撫定續遣來報山後若未可往卽營田牧馬俟及秋成乃圖大舉更當熟議見可則行如欲益兵具數來上不

可恃一戰之勝輒有弛慢新降附者當善撫存宣諭將士使知朕意宗翰駐北安遣希尹等略地獲遼護衛耶律習泥烈知遼主獵鴛鴦灤以其子晉王賢而有人望惡而殺之衆益離心雖有西北西南兩路兵馬皆羸弱遂遣縛盪溫都等報都統杲進兵襲之三月都統杲出青嶺宗翰出瓢嶺追遼主于鴛鴦灤遼主奔西京宗翰復追至白水灤不及獲其貨寶已已至西京壬申西京降希尹追遼主于乙室部不及乙亥西京復叛是月遼秦晉國王耶律捏里卽位于燕四月辛卯復取西京壬辰遣徒單吳甲高慶裔于宋戊戌都統杲自西京趨白水灤吳勃極烈昱襲毗室部于鐵呂川爲敵所敗還會察刺兵追至黃水北大破之耶律坦招徠西南諸部西至夏其招討使耶律佛頂降金肅西平二郡漢軍四千餘人叛去耶律坦等襲取之闍母婁室招降天德雲內寧邊東勝等州獲阿疎而還是時山西城邑諸部雖降人心未固遼主保陰山耶律捏里在燕京都統杲遣宗望入奏請上臨軍五月辛酉宗望來奏捷百官入賀賜宴歡甚先是獲遼樞密使得里底節度使和尚雅里斯余里野等都統杲使阿鄰護送赴闕得里底道亡阿鄰坐誅耶律捏里遣使請罷兵戊寅使楊勉以

書諭捏里使之降謀葛失遣其子菹泥刮失貢方物六月戊子朔上親征遼發自上京詣班勃極烈吳乞買監國辛亥詔諭上京官民曰朕順天弔伐已定三京但以遼主未獲兵不能已今者親征欲由上京路進恐撫定新民驚疑失業已出自篤密呂其先降後叛逃入險阻者詔後出首悉免其罪若猶拒命孥戮無赦是月耶律捏里卒斡魯婁室敗夏人於野谷七月甲子詔諸將無得遠迎以廢軍務乙丑上京漢人毛八十率二千餘戶降因命領之丙寅以斡答剌招降者衆命領八千戶以忽薛副之壬午希尹以阿疎見杖而釋之八月己丑次鴛鴦灤都統杲率官屬來見癸巳上追遼主于大魚灤昱宗望追及遼主于石輦鐸與戰敗之遼主遁己亥次居延北辛丑中京將完顏渾黜敗契丹奚漢六萬于高州李董麻吉死之得里得滿部降昱宗望追遼主于烏里質鐸不及九月庚申次草灤闌母平中京部族之先叛者及招撫沿海郡縣節度使耶律慎思領諸部入內地乙丑詔六部奚曰汝等旣降復叛扇誘衆心罪在不赦尙以歸附日淺恐綏懷之道有所未孚故復令招諭若能速降當釋其罪官皆仍舊歸化州降戊辰次歸化州甲戌宗雄薨丁丑奉聖州降十月丙戌朔

次奉聖州詔曰朕屢勅將臣安輯懷附無或侵擾然愚民無知尙多逃匿山林卽欲加兵深所不忍今其逃散人民罪無輕重咸與矜免有能率衆歸附者授之世官或奴婢先其主降並釋爲良其布告之使諭朕意蔚州降庚寅余覩等遣蔚州降臣翟昭彥徐興田慶來見命昭彥慶皆爲刺史興爲團練使詔曰比以幽薊一方招之不服今欲帥師以往故先安撫山西諸部汝等旣已懷服宜加撫存官民未附已前罪無輕重及係官逋負皆與釋免諸官各遷敘之丁酉蔚州翟昭彥田慶殺知州事蕭觀寧等以叛丙午復降十一月詔諭燕京官民王師所至降者赦其罪官皆仍舊十二月上伐燕京宗望率兵七千先之迪古乃出得勝口銀朮哥出居庸關婁室爲左翼婆盧火爲右翼取居庸關丁亥次媯州戊子次居庸關庚寅遼統軍都監高六等來送欵上至燕京入自南門使銀朮哥婁室陳于城上乃次于城南遼知樞密院左企弓虞仲文樞密使曹勇義副使張彥忠參知政事康公弼僉書劉彥宗奉表降辛卯遼百官詣軍門叩頭請罪詔一切釋之壬辰上御德勝殿羣臣稱賀甲午命左企弓等撫定燕京諸州縣詔西京官吏曰乃者師至燕都已皆撫定唯蕭妃與官屬數

人遁去已發兵追襲或至彼路可執以來黃龍府叛宗輔討平之

七年正月丁巳遼奚王回离保僭稱帝甲子遼平州節度使時立愛降詔曲赦平州又詔諸班勃極烈曰比遣昂徙諸部民人于嶺東而昂悖戾騷動煩擾致多怨叛其違命失衆當賞重典若或有疑禁錮以待庚午詔中京都統幹論曰聞卿撫定人民各安其業朕甚嘉之回离保聚徒逆命汝宜計畫無使滋蔓壬申詔招諭回离保癸酉以時立愛言招撫諸部己卯宋使來議燕京西京地庚辰宜錦乾顯成川豪懿等州皆降甲申詔曰諸州部族歸附日淺民心未寧今農事將興可遣分諭典兵之官無縱軍士動擾人民以廢農業二月乙酉朔命撒八詔諭興中府降之遼來州節度使田顯隰州刺史杜師回遷州刺史高永福潤州刺史張成皆降壬辰詔諸班勃極烈曰郡縣今皆撫定有逃散未降者已釋其罪更宜招諭之前後起遷戶民去鄉未久豈無懷土之心可令所在有司深加存恤毋輒有騷動衣食不足者官賑貸之癸巳詔曰頃因兵事未息諸路關津絕其往來今天下一家若仍禁之非所以便民也

自今顯咸東京等路往來聽從其便其間被虜及鬻身者並許自贖爲良仍令馳驛

布告興中宜州復叛宋使趙良嗣來請加歲幣以代燕稅及議畫疆與遣使賀正旦
生辰置權場交易并計議西京等事癸卯銀尤哥鐸刺如宋乙巳詔都統杲曰新附
之民有材能者可錄用之戊申詔平州官與宋使同分割所與燕京六州之地癸丑
大赦是月改平州爲南京以張覺爲留守三月甲寅朔將誅昂以習不諫杖之七
十仍拘泰州戊午都統杲等言耶律麻哲余覲吳十鐸刺等謀叛宜早圖之上召余
覲從容謂之曰朕得天下皆我君臣同心同德以成大功固非汝等之力今聞汝等
謀叛若誠然耶必須鞍馬甲冑器械之屬當悉付汝朕不食言若再爲我擒無望免
死欲留事朕無懷異志吾不汝疑余覲皆戰慄不能對命杖鐸刺七十餘並釋之宋
使盧益趙良嗣馬宏以國書來四月丁亥遣幹魯宗望襲遼主于陰山壬辰復書于
宋師初入燕遼兵復犯奉聖州林牙大石壁龍門東二十五里都統幹魯聞之遣照
立婁室馬和尚等率兵討之生獲大石悉降其衆癸巳詔曰自今軍事若皆中覆不
無留滯噤此路事務申都統司餘皆取決樞密院契丹九斤聚黨興中府作亂擒之
九斤自殺命習古乃婆盧火監護長勝軍及燕京豪族工匠由松亭關徙之內地已

亥次儒州幹魯宗望等襲遼權六院司喝離質于白水濼獲之其宗屬秦王許王等十五人降聞遼主留輜重青塚以兵萬人往應州遣照里背答宗望婁室銀朮哥等追襲之宗望追及遼主決戰大敗之獲其子趙王習泥烈及傳國璽五月甲寅南京留守張覺據城叛丙寅次野狐嶺己巳次落藜濼幹魯等以趙王習泥烈林牙大石駙馬乳奴等來獻并上所獲國璽宗雋以所俘遼主子秦王許王女奧野等來見奚路都統撻懶攻速古噉里鐵尼所部十三巖皆平之又遣奚馬和尙攻下品達魯古并五院司諸部執其節度乙列回離保爲其下所殺辛巳詔諭南京官民六月壬午朔次鴛鴦濼是日闍母敗張覺于營州丙申上不豫將還上京命移賚勃極烈宗翰爲都統吳勃極烈昱迭勃極烈幹魯副之駐兵雲中以備邊己酉次幹獨山驛召諳班勃極烈吳乞買七月辛酉次牛山宗翰還軍中八月辛巳朔日有食之乙未次渾河北諳班勃極烈吳乞買率宗室百官上謁戊申上崩于部堵濼西行宮年五十六九月癸丑梓宮至上京乙卯葬宮城西南寧神殿丙辰諳班勃極烈卽皇帝位天會三年三月上尊諡曰武元皇帝廟號太祖立原廟于西京天會十三年二月辛酉改

葬和陵立開天啟祚睿德神功之碑于燕京城南嘗所駐蹕之地皇統四年改和陵曰睿陵五年十月增謚應乾興運昭德定功睿神莊孝仁明大聖武元皇帝眞元三年十一月改葬于大房山仍號睿陵

哀宗

金史

哀宗諱守緒初諱守禮又諱寧甲速宣宗第三子母曰明惠皇后王氏賜姓溫敦氏仁聖皇后之女兒也承安三年八月二十三日生於翼邸仁聖無子養爲己子泰和中授金紫光祿大夫宣宗登極進封遂王授秘書監改樞密使貞祐初莊獻太子守忠薨立皇孫鏗爲皇太孫尋又薨四年正月己卯立守禮爲皇太子仍控制樞密院事詔略曰子以母貴遂王守禮地鄰豕嫡慶集元妃立爲皇太子其典禮有司條具以聞四月甲午用太子少保張行信言更賜名守緒元光二年十二月庚寅宣宗崩辛卯奉遺詔卽皇帝位于柩前壬辰詔大赦略曰朕述先帝之遺意有使於時欲行而未及者悉奉而行之國家已有定制有司往往以情破法使人罔遭刑憲今後有本條而不遵者以故入人罪罪之草澤士庶許令直言軍國利害雖涉譏諷無可采

取者並不坐罪

正大元年春正月戊戌朔詔改元正大庚子上居廬百官始奏事秘書監權吏部侍郎蒲察合住改恒州刺史左司員外郎泥龐古華山同知楨州軍州事逐二姦臣大夫士相賀邠州節度使移刺木納阿卜貢白兔詔曰得賢臣輔佐年穀豐登此上瑞也焉事此爲令有司給道里費縱之本上禮部其徧諭四方使知朕意丁巳詔朝臣議修復河中府禮部尙書趙秉文太常卿楊雲翼等言陝西民方疲敝未堪力役遂止戊午上始視朝大司農守汝州防禦使李蹊爲太常卿權參知政事平章政事荆王守純罷判睦親府參知政事僕散五斤罷充大行山陵使尊皇后溫敦氏元妃溫敦氏皆爲皇太后號其宮一曰仁聖一曰慈聖百官入賀於隆德殿是日大風飄端門瓦赤蓋合喜權樞密副使有男子服麻衣望承天門且笑且哭詰之則曰吾笑笑將相無人吾哭哭金國將亡羣臣請寘重典上持不可曰近詔草澤諸人直言雖涉譏訕不坐法司唯以君門非笑笑之所重杖而遣之南陽民布陳謀反伏誅三月癸惑犯左執法戊申奉安宣宗御容於孝嚴寺辛亥丞相高汝礪薨癸丑葬宣宗于德

陵甲寅起復邠州節度使致仕張行信爲尙書左丞以延安帥臣完顏合達戰禦有功授金虎符權參知政事行尙書省事于京兆兼統河東兩路夏四月癸酉宣宗祔廟大赦中外熒惑犯右執法五月戊戌平章政事把胡魯薨癸卯樞密副使完顏賽不爲平章政事權參知政事石蓋尉忻爲尙書右丞太常卿李蹊爲翰林承旨仍權參政甲辰賜策論進士李尤論長河以下十餘人及第經義進士張介以下五人及第戊申賜詞賦進士王鶚以下五十人及第詔刑部登聞檢鼓院毋鎖閉防護聽有寃者陳訴六月甲戌宰執請擊鞠上以新喪不許辛卯立妃徒單氏爲皇后遣樞密判官移刺蒲阿率兵至光州榜諭宋界軍民更不南伐秋七月己亥詔諭百官各勤乃職癸卯補修大樂九月樞密判官移刺蒲阿復澤潞獲馬千疋冬十月戊午夏國遣使來修好十一月乙巳桓州刺史蒲察合住有罪伏誅甲寅宣宗小祥燒飯於德陵改定辟舉縣令法以六事課縣令京東西南陝西設大司農司兼採訪公事京師大司農總之左丞張行信言先帝詔國內刑不上大夫治以廉恥丞相高琪所定職官犯罪的決百餘條乞改依舊制上欲彰先帝之美略施行之

二年春正月甲申有黃黑之祲夏四月辛卯朔恒山公武仙自眞定府來奔起復平章政事致仕莘國公胥鼎爲平章政事行省事于衛州進封英國公甲午以京畿旱遣使慮囚鈞許州大雨雹丁酉宿鄭州雨傷麥五月丁丑以旱甚責已避正殿減常膳赦罪蘇椿自大名來奔詔置椿許州秋七月都水蒲察毛花輦殺人免死除名八月鞏州元帥田瑞反行省軍圍之其母弟十哥殺瑞出降赦其罪以爲涇州節度使世襲猛安九月夏國和議定以兄事金各用本國年號遣使來聘奉國書稱弟冬十月以夏國修好詔中外新軍政改總領爲都尉己酉以誅田瑞詔中外癸亥遣禮部尙書奧敦良弼大理卿裴滿欽甫侍御史烏古孫弘毅爲夏國報成使國書稱兄乙亥面諭臺諫完顏素闌陳規曰宋人輕犯邊界我以輕騎襲之冀其懲創通好以息吾民爾夏人從來臣屬我朝今稱弟以和我尙不以爲辱果得和好以安吾民尙欲用兵乎卿等宜悉朕意移刺蒲阿及宋人戰於光州獲馬數千殺人千餘而還內族王家奴故殺鮮于主簿權貴多救之者上曰英王朕兄敢妄撻一人乎朕爲人主敢以無罪害一人乎國家衰弱之際生靈有幾何而族子恃勢殺一主簿吾民無主矣

特命斬之詔有司爲死節士十有三人立褒忠廟禁宿泗青口巡邊官兵毋復擅殺過淮紅衲軍詔趙秉文楊雲翼作龜鏡萬年錄

三年春正月丁巳朔夏國遣使來賀三月陝西旱平章政事胥鼎復請致仕不許詔尙書省議省減用度夏四月辛卯親享于太廟郕國夫人車經御路過廟前馭者乘馬二婢坐車中俱不下詔繫獄杖之辛丑以旱遣官禱於濟瀆癸卯祈於太廟禁繖扇河南大雨雹己酉遣使慮囚遣使捕蝗五月己未大雨宋兵掠壽州境癸亥永州桃園軍失利死者四百人乙丑大雨壬申詔諭陝州趙甫等能以土地來歸當任使之六月辛卯京東大雨雹蝗盡死壬子詔諭高麗及遼東行省葛不露討反賊萬家奴赦脅從者秋七月庚午平章政事英國公胥鼎薨八月移刺蒲阿復曲沃及晉安辛卯詔設益政院於內廷以禮部尙書楊雲翼等爲益政院說書官日二人直備顧問冬十月丁酉夏使來報哀十一月庚申議與宋修好戊辰又議之己巳宋忠義軍夏全自楚州來歸楚州王義深張惠范成進以城降封四人爲郡王辛未改楚州爲平淮府以夏全等來降赦諸路從宋及淮楚官吏軍民并其家屬甲戌遣使夏國賀

正旦丙子夏以兵事方殷來報各停使聘大元兵征西夏平中興府召陝西行省及陝州總帥完顏訛可靈寶總帥紇石烈牙吾塔赴汴議兵事詔諭陝西兩省凡戎事三品以下官聽以功過賞罰之銀二十五萬兩從其給賞遣中大夫完顏履信爲弔祭夏國使

四年春正月辛亥朔壬戌增築中京城浚汴城外濠二月蒲阿牙吾塔復平陽執知府李七斤獲馬八千三月簽勞效官充軍有怨言不果用以銀贖平陽虜獲男女分賜官軍者聽自便大元兵平德順府節度使愛申攝府判馬肩龍死之大元兵復下平陽己巳徵夏稅二倍夏五月丁丑議乞和於大元大元兵平臨洮府總管陔滿胡土門死之陝西行省進三策上策自將出戰中策幸陝州下策棄秦保潼關不從六月戊申朔遣前御史大夫完顏合周爲議和使丙辰地震太白入井賜詞賦經義盧亞以下進士第秋七月大元兵自鳳翔徇京兆關中大震工部尙書師安石爲尙書右丞壬辰以中丞烏古孫卜吉祭酒裴滿阿虎帶兼司農卿簽民軍勸率富民入保城聚兼督秋稅令百姓知避遷之計丁酉赦陝西東西兩路賜民今年租八月庚戌

詔有司罷遣防備丁壯修城民夫軍須差發應不急者權停己巳萬年節同知集賢院史公奕進大定遣訓待制呂造進尙書要略是日大風落左掖門鷓尾壞丹鳳門扉隕霜禾盡損李全自益都復入楚州據之遣總帥完顏訛可元帥慶山奴守盱眙與全戰于龜山敗績冬十月辛酉右拾遺李大節右司諫陳規劾同判睦親府事撒合輦姦賊不報壬戌外臺監察御史諫獵上怒以邀名賣直責之詔贈德順府死事愛申馬肩龍等官以淮南王爵招李全十一月乙未未時日上有二白虹貫之丁酉獵於近郊十一月眞授李蹊參知政事大元兵下商州壬子遣使安撫陝西以牛千頭賜貧民

五年春正月丁丑親祭三廟庚辰遣知開封府事完顏麻斤出如大元弔慰丙戌議擊盱眙辛卯以龜山之敗降元帥慶山奴爲定國軍節度使二月乙巳朔大寒雷雨雪木之華者盡死癸丑詔有司以臨洮總管陶蒲胡土門塑像入褒忠廟書死節子孫於御屏量材官使之三月甲戌朔羣臣請依祖宗故事樞密院聽尙書省節制不從乙酉監察御史烏古論不魯刺劾近侍張文壽張仁壽李麟之受饋遺曲赦其罪

而出之夏四月甲辰朔以御史言三姦不已凡四日不視朝八日議放還西夏人口丙寅右丞師安石薨親衛軍王咬兒酌酒殺其孫大理寺當以徒刑特命斬之五月癸巳定國軍節度使慶山奴以受賂奪一官六月壬戌以旱赦雜犯死罪已下秋七月戊子同判睦親府事撤合輦出爲中京留守行樞密院事八月乙卯以旱遣使禱於上清宮甲子參知政事白撒爲尙書右丞太常卿顏蓋世魯權參知政事增築歸德行樞密院擬工役數百萬詔遣權樞密院判官白華喻以農夫勞苦減其工三之二以節制不一併衛州帥府於恒山公府命白華往經畫之九月庚寅雨足始種麥冬十一月辛巳進宣宗實錄十二月庚子朔日有食之完顏麻斤出以奉使不職免死除名壬子完顏訥申改侍講學士充國信使以陝西大寒賜軍士柴炭銀有差京兆鳳翔府司竹監進竹令分給之

六年春二月丙辰樞密院判官移刺蒲阿權樞密副使耀州刺史李興有戰功詔賜玉兔鶻帶金器以丞相完顏賽不行尙書省事于關中召平章政事完顏合達還朝移刺蒲阿率忠孝軍總領完顏陳和尚忠孝軍一千騎駐邠州遣白華馳喻蒲阿以

用兵之意詔樞密更給忠孝軍馬疋以漸調發都尉司步卒及忠孝軍屯京西以白華專備軍須三月乙亥忠孝軍總領陳和尙有戰功授定遠大將軍平涼府判官世襲謀克夏五月隴州防禦使石抹冬兒進黃鸚鵡詔曰外方獻珍禽異獸違物性損人力令勿復進秋七月罷陝西行省軍中浮費八月移刺蒲阿再復澤潞九月洮河蘭會元帥顏蓋蝦蟆進西馬二疋詔曰卿武藝超絕此馬可充戰用朕乘此豈能盡其力旣入進卽尙廐物也今以賜卿其悉朕意冬十月移刺蒲阿東還令陳和尙率陝西歸順馬軍屯鈞許大元兵駐慶陽界詔陝西行省遣使奉羊酒幣帛乞緩師請和十一月遣使鈞許選試陝西歸順人得軍二千以藝優者充忠孝軍次充合里合軍十二月詔副樞蒲阿總帥紇石烈牙吾塔權簽樞密院事完顏訛可救慶陽罷附京獵地百里聽民耕稼

七年春正月副樞蒲阿總帥牙吾塔權簽院事訛可解慶陽之圍以訛可屯邠州蒲阿牙吾塔還京兆夏五月詔釋清口宋敗軍三千人願留者五百人以屯許州餘悉縱遣之賜經義詞賦李璿以下進士第秋七月以平章政事合達權樞密副使八月

賜陝西死事之孤鹽引及絹仍量材任使大元兵圍武仙於舊衛州冬十月平章合達副樞蒲阿引兵救衛州衛州圍解上登承天門犒軍合達蒲阿並世襲謀克移刺蒲阿權參知政事同合達行省事於闕鄉以備潼關

八年春正月大元兵圍鳳翔府遣樞密院判官白華右司郎中夾谷八里門諭闕鄉行省進兵合達蒲阿以未見機會不行復遣白華諭合達蒲阿將兵出關以解鳳翔之圍又不行夏四月丁巳朔赦全免京西路軍需錢一年旱災州縣差稅從實減貸大元兵平鳳翔府兩行省棄京兆遷居民於河南留慶山奴守之五月李全妻楊妙真以全陷沒于宋構浮梁楚州北欲復宋讎遣合達蒲阿屯桃源界激河口以備侵軼宋八里莊人拒其主將納合達蒲阿詔改八里莊爲鎮淮府秋七月宋將焚浮梁九月丙申慈聖宮皇太后温敦氏崩遣誥園陵制度務從儉約大元兵駐河中府慶山奴棄京兆東還召合達蒲阿赴汴議引兵趨河中府懼不敢行還陝州出師至冷水谷而歸大元兵攻河中府合達蒲阿遣元帥王敢率兵萬人救之冬十月右丞相賽不致仕十一月丁未大元進兵嶢峯關由金州而樞密院議以逸待勞未可與戰

上諭之曰南渡二十年所在之民破田宅鬻妻子竭肝腦以養軍今兵至不能逆戰止以自護京城縱存何以爲國天下其謂我何朕思之熟矣存與亡有天命惟不負吾民可也乃詔諸將屯軍襄鄧十二月己未葬明惠皇后河中府破權簽樞密院事草火訛可死之元帥板子訛可提敗卒三千走闕鄉詔赦將佐以下杖訛可二百以死合達蒲阿率諸軍入鄧州楊沃衍陳和尚武仙皆引兵來會出屯順陽戊辰大元兵渡漢江而北丙子畢渡合達蒲阿將兵禦于禹山之前大元兵分道趨汴京京師戒嚴是夜二鼓合達蒲阿引軍還鄧州大元兵躡其後盡獲其輜重

天興元年春正月壬午朔日有兩珥大元兵道唐州元帥完顏兩婁室與戰襄城之汝墳敗績兩婁室走汴京遣完顏麻斤出等部民丁萬人決河水衛京城癸未置尙書省樞密院于宮中以便召問起前元帥古里甲石倫權昌武軍節度使行元帥府事合達蒲阿引軍自鄧州赴汴京乙酉以點檢夾谷撒合爲總帥將步騎三萬巡河渡權近侍局使徒單長樂監其軍起近京諸邑軍家屬五十萬口入京丙戌大元兵既定河中由河清縣白坡渡河丁亥長樂撒合引兵至封丘而還戊子左司郎中斜

卯愛實上書請斬長樂撒合以肅軍政不從都尉烏林答胡土一軍自潼關入援至偃師聞大元兵渡河遂走登封少室山壬辰衛州節度使完顏斜捨阿不棄城走汴甲午修京城樓櫓及守禦備大元兵薄鄭州與白坡兵合屯軍元帥馬伯堅以城降防禦使烏林答咬住死之乙未大元游騎至汴城丁酉大雪大元兵及兩省軍戰鈞州之三峯山兩省軍大潰合達陳和尚楊沃衍走鈞州城破皆死之樞密副使蒲阿就執尋亦死武仙走密縣自是兵不復振己亥徐州行省完顏慶山奴引兵入援義勝軍校侯進杜正張興率所部北降慶山奴入睢州庚子御端門肆赦改元開興辛丑潼關守將李平以關降大元壬寅扶溝民錢大亨李鈞叛殺縣令王浩及其簿尉庚戌許州軍變殺元帥古里甲石倫粘合全周蘇椿等以城降大元二月壬子朔慶山奴謀走歸德至陽驛店遇大元兵徐帥完顏兀里力戰而死慶山奴被擒使招京城不從睢州刺史張文壽棄城從慶山奴皆死之甲寅大元兵狗臨渙攝縣令張若愚死之戊午次盧氏關陝行省總帥兩軍及秦藍帥府軍棄潼關而東與之遇天又大雪未戰而潰行省徒單兀典總帥納合合閏敗死完顏重喜降斬于馬前都尉鄭

倜殺都尉苗英亦降秦藍總帥府經歷商衡死之大元兵下睢州庚申翰林待制馮延登使北來歸乙丑大元兵攻歸德庚午起復右丞相致仕賽不爲左丞相括京師民軍二十萬隸諸帥人月給粟一石有五斗三月丁亥大元軍平中京留守撒合輦投水死甲午命平章政事白撒宿上清宮樞密副使合喜宿大佛寺以備緩急大元遣使自鄭州來諭降使者立出國書以授譯史譯史以授宰相宰相跪進上起立受之以付有司書索翰林學士趙秉文衍聖公孔元措等二十七家及歸順人家屬蒲阿妻子繡女弓匠鷹人又數十人庚子封荆王子訛可爲曹王議以爲質密國公璿以曹王幼請代行上慰遣之不聽其代壬寅尙書左丞李蹊送曹王出質諫議大夫裴滿阿虎帶太府監國世榮爲講和使戶部侍郎楊慥權參知政事分軍防守四城大元兵攻汴城上出承天門撫西面將士千戶劉壽語不遜詔釋勿問癸卯上復出撫東面將士親傳戰傷者藥于南薰門下仍賜卮酒出內府金帛器皿以賞戰士乙巳鳳翔府砲軍萬戶王阿驢樊喬來歸己酉造革車三千兩已而不用置局養無家俘民夏四月癸丑兵士李新有功擢四方館使元帥劉益比其子戰死丁巳遣戶

部侍郎楊仁奉金帛詣大元兵乞和戊午又以珍異往謝許和癸亥明惠皇后陵被發失柩所在遣中官往視之至是始得以兵護宮女十人出迎朔門奉柩至城下設御幄安置是夜復葬之戮鄭侗妻子甲子御端門肆赦改元天興詔內外官民能完復州郡者功賞有差出金帛酒炙犒飭軍士減御膳罷冗員放宮女上書不得稱聖改聖旨爲制旨釋鑄厲王衛紹王二族禁錮聽自便乙丑百官初起居于隆德殿前丙寅以尙書省兼樞密院事丁卯放宮女聽以衣裝自隨金珠留犒士卒汴京解嚴步軍始出封丘門采薪蔬己巳建威都尉完顏兀論同大元使沒忒入城庚午見使臣於隆德殿放宮女如前辛未開鄭門聽百姓男子出入甲戌御承天門大饗將士聞有聲屈者乃還宮乙亥有詔止奏事許州進櫻桃五月辛巳遷民告出城者以萬數賽不白撒不聽乙酉以南陽郡王子思烈行尙書省于鄧州召援兵丙戌拜天於大慶殿詔白撒致仕放京城四面軍李辛不奉詔丁亥鑿洧川漕渠尋罷之馮延登以奉使有勞授禮部侍郎戊子裕州鎮防軍將領賀都喜率西軍二千人入援放遷民出京辛卯大寒如冬密國公孺薨汴京大疫凡五十日諸門出死者九十餘萬人

貧不能葬者不在是數癸巳楊春入據亳州觀察判官劉均死之辛丑上御香閣面責宰相乙丑將相受保城爵賞六月庚戌朔詔百官舉大將衆舉劉益不能用癸丑飛虎軍二百人奪封丘門出奔甲寅以出師錮門禁乙卯白撒開渠於私第東丙辰閱官馬擇瘠者殺以食丁巳封仙據徐州徒單益都走宿州推張興行省事庚申塞京城四門以便守禦壬戌國用安入徐州殺張興推封仙爲元帥以主州事己巳詔贈禦侮中郎將完顏陳和尚鎮南軍節度使立褒忠廟碑權參知政事楊慥罷辛未復修汴城以疫後園尸僧道醫師粥棺者擅厚利命有司倍征之以助其用甲戌宿州鎮防千戶高臘哥李宣殺節度使紇石烈阿虎父子請行省徒單益都主帥事益都不從率其將吏西走至穀熟遇大元軍死之乙亥左丞李蹊送曹王與其子全俱還丁丑恆山公武仙殺土人李汾七月庚辰朔兵亦有火辛巳軍士搗登聞鼓乞將劉益癸未尙書右丞顏蓋世魯罷吏部尙書完顏奴申爲參知政事甲申飛虎軍事申福蔡元擅殺北使唐慶等三十餘人于館詔賞其罪和議遂絕乙酉都人揚言欲殺白撒密詔遣衛士護其家丙戌軍士毀白撒別墅斜捻阿不妄殺市人之過其門

者以靖亂丁亥拜天子承天門下出內府及兩宮物賜軍士戊子下令招軍辛卯簽民爲兵鞏昌民百二十人赴援乙未宿州帥衆僧奴稱國安用降遣近侍直長因世英等持詔封安用爲兗王行京東等路尙書省事賜姓完顏改名用安新軍有搃登聞鼓者杖殺之乙巳金木火太陰會于軫翼丙午參知政事完顏思烈恆山公武仙鞏昌總帥完顏忽斜虎率諸將兵自汝州入援以合喜爲樞密使將兵一萬應之命左丞李蹊勸諭出師乃行八月己酉朔合喜屯杏花營又益兵五千人始進屯中牟故城庚戌發丁壯五千人運糧餉合喜軍辛亥虎顏思烈遇大元兵于京水遂潰武仙退保留山思烈走御寨中京元帥左監軍壬子任守貞死之合喜棄輜重奔至鄭門聚兵乃入甲寅免合喜爲庶人籍其家以賜軍士降監軍長樂爲符寶郎丁巳釋奠孔子戊午括民間粟己未籍徒單兀典完顏重喜納合閏家貲前儀封令魏璠上言鞏昌帥完顏仲德沉毅有遠謀臣請奉命往召不報戊辰免府試起復前大司農侯摯爲平章政事進封蕭國公行京都路尙書省事己巳摯帥兵行至封丘將士將潰摯止之乃與衆還汴壬申聽無軍家口戊京甲戌金木星交乙亥賣官及許買

進士第丙子詔罷括粟復以進獻取之丁丑京城民楊興入貲授延州刺史戊寅劉仲溫入貲授許州刺史

九月戊寅朔詔減親衛軍己丑軍士殺鄭門守者出之庚辰起上黨公張開及臨淄郡王王義深廣平郡王范成爲元帥以前御史大夫完顏合周權參知政事乙未以勝召民賣放下年軍需錢上戶田租如之辛丑夜大雷工部尙書范乃速震死閏月戊申朔遣使以鐵券一虎符六大信牌十織金龍文御衣賜越王玉魚帶一弓矢二賜兗王用安其父母妻皆贈封之又以世襲宣命十郡王宣命十玉兔鶻帶十付用安其同盟可賜者卽賜之辛亥遣張開溫撒辛劉益高顯率步軍護陳留通許糧道罷貧民進獻糧戊午招鄉導己未有箭射入宮中書姦臣姓名兩日而再得之辛酉再括京城粟以御史大夫合周點檢徒單百家等主之丙寅括粟使者兵馬都總領完顏九住以粟有蓬稗杖殺孝婦于省門十月以前司農卿李煥飛語詔左丞李蹊戶部侍郎楊慥繫獄將以軍儲失計坐罪俄蹊慥並除名而止籍慥家貲煥遂權戶部尙書尋赦殘欠糧其應以糧事繫者皆釋之詔徵諸道軍明以十二月一日入援

十一月丁未朔賜貧民粥平章政事侯摯致仕左司郎中斜卯愛實以言事忤近侍送有司尋釋之己酉衛州軍校白晝取豐備倉米壬子京城人相食癸丑詔曹門宋門放士民出就食壬戌召諸將相入議事兗王用安率兵至徐州元帥王德全閉城不納會劉安國與宿帥衆僧奴引兵入援至臨渙用安使人刼殺之攻徐州久不能下退保漣水制使因世英以用安不赴援還至宿州西遇大元兵死之丙寅河解元帥權興寶軍節度使趙偉襲據陝州以叛殺行省阿不罕奴十刺以下凡二十一人誣阿不罕奴十刺等反狀以聞上知其寃不能直其事就授偉元帥左監軍兼西安軍節度使行總帥府事偉尋亦歸北十二月丙子朔以事勢危急遣近侍郎白華問計華對以紀季以嚮入齊之義遂以爲右司郎中甲申詔議親出乙酉再議於大慶殿上欲以官奴高顯劉益爲元帥不果是日除拜扈從及留守京城官以右丞相樞密使兼左副元帥賽不平章政事權樞密使兼右副元帥白撒右副元帥兼樞密副使權參知政事訛出兵部尙書權尙書左丞李蹊元帥左監軍行總帥府事徒單百家等率諸軍扈從參知政事兼樞密院副使完顏奴申樞密副使兼知開封府權參

知政事習捏阿不裏城四面都總領戶部尙書完顏珠顆外城東面元帥把撒合南面元帥朮甲咬住西面元帥崔立北面元帥孛魯買奴等留守除拜既定以京城付之擢魏璠爲翰林修撰如鄧州招武仙入援丁亥上御端門發府庫及兩府器皿宮人衣服賜將士戊戌官奴阿里合謀立荆王不果朝廷知其謀置不問庚子上發南京與太后皇后諸妃別大慟行次公主苑太后遣中官持米肉徧犒軍士辛丑至開陽門外麾百官退詔諭戍兵曰社稷宗廟在此汝等壯士也毋以不預進發之數便謂無功若保守無虞將來功賞顧豈在戰士下聞者皆灑泣是日鞏昌元帥完顏忽斜虎至自金昌爲上言京西三百里之間無井竈不可往東行之議遂決以爲尙書右丞從行遂次陳留壬寅次杞縣癸卯次黃城丞相完顏賽不之子按春有罪伏誅甲辰次黃陵岡乙巳諸將請幸河朔從之

二年正月丙午朔濟河北風大作後軍不克濟丁未大元兵追擊于南岸元帥完顏猪兒賀都喜死之建威都尉完顏兀論出降丁酉上哭祭戰死士于河北岸皆贈官斬兀論出二弟以殉赦河朔招集兵糧議取衛州元帥蒲察官奴將忠孝軍千人東

面元帥高顯果毅都尉粘哥咬住領軍萬人爲前鋒至蒲城庚戌上次漚麻岡平章政事白撒元帥和速嘉兀底不繼至辛亥白撒引兵攻衛州不克乙卯聞大元兵自河南渡河至衛之西南遂退師丁巳戰于白公廟白撒敗績棄軍東遁元帥劉益上黨公張開亦遁並爲民家所殺益部曲王全降戊午上進次蒲城復還魏樓村李辛自汴京出奔伏誅己未上以白撒謀夜棄六軍渡河與副元帥合里合六七人走歸德庚申諸軍始知上已往遂潰辛酉司農大卿蒲察世達元帥完顏忽土出歸德西門奉迎上入歸德赦在府囚軍民普覃一官賜進士終場王輔以下十六人出身遣奉御朮甲塔失不后弟徒單四喜往汴京奉迎兩宮白撒還自蒲城聚兵於大橋不敢入壬戌遣使召白撒至數其罪下之獄仍籍其家財以賜將士曰汝輩宜竭忠力毋如斯人誤國人予金一兩七日白撒及其子忽土鄰皆死獄中右丞相賽不致仕右丞完顏忽斜虎行省事于徐州官奴再請率兵北渡女魯權不可遣歸德知府行戶部尙書蒲察世達都轉運使張俊民如陳蔡取糧以元帥李琦王璧護之戊辰安平都尉京城西而元帥崔立與其黨韓鐸藥安國等舉兵爲亂殺參知政事完顏奴

申樞密副使完顏斜捻阿不勒兵入見太后傳令立衛王子從恪爲梁王監國卽自爲太師馬軍都元帥尙書令尋自稱左丞相都元帥尙書令鄭王弟倚平章政事侃殿前都點檢其黨孛朮魯長河御史中丞韓鐸副元帥兼知開封府折希顏藥安國張軍奴完顏合答並元帥師肅左右司郎中賈良兵部郎中兼右司都事又署工部尙書溫迪罕二十吏部侍郎劉仲周並爲參知政事宣徽使奧屯舜卿爲尙書左丞戶部侍郎張正倫爲尙書右丞左右司都事張節爲左右司郎中尙書省掾元好問爲左右司員外郎都轉運知事王天祺懷州同知康瑋並爲左右司都事開封判官李禹翼棄官去戶部主事鄭著召不起是日右副點檢溫敦阿里左右司員外郎聶天驥御史大夫裴蒲阿虎帶諫議大夫左右司郎中烏古孫奴申左副點檢完顏阿散奉御忙哥講議蒲察琦並死之遂送款大元軍前癸酉大元將碎不斛進兵汴京甲戌立閱隨駕官屬軍民子女於省署及禁民間嫁娶括京城財兩宮值變不果行答失不以其父咬住四喜以其妻奪門而出庚午至歸德上怒二人皆斬於市乙亥遣右宣徽提點近侍同事移刺粘古如徐州相地形察倉庫虛實白華如鄧州召兵

二月丙子朔魚山張璪殺元帥完顏忽土行省忽剌虎自率兵討之會從宜嚴祿誅璪乃還括城中糧知歸德府事石蓋女魯懽爲樞密副使權參知政事留元帥官奴忠孝軍四百五十人都尉馬用軍二百八十餘人發餘軍赴宿徐陳三州就糧三月乙丑石蓋女魯懽乞盡散衛兵出城就食官奴私與國用安謀邀上幸海州不從蔡帥烏古論鑄以糧四百餘斛至歸德表請臨幸上遣學士烏古論蒲鮮以幸蔡之意諭其州人戊辰官奴以忠孝軍爲亂攻殺馬用遂殺尙書左丞李蹊參知政事石蓋女魯懽點檢徒單長樂從官右丞已下三百餘人上赦官奴暴女魯懽罪狀以官奴爲樞密副使權參知政事左右司郎中張天綱爲戶部侍郎權參知政事辛巳官奴眞授參知政事兼左副元帥官奴以上居照碧堂禁諸臣無一人敢奏對者上日悲泣言曰自古無不亡之國不死之主但恨朕不知用人致爲此奴所囚耳遂與內局令宋珪等謀誅官奴夏四月壬午徐州行省完顏忽剌虎執王德全并其子誅之及其黨王琳楊瓚斜卯延壽召經歷商瑀用之魚山從宜嚴祿叛歸漣水庚寅陳州都尉李順兒殺行省粘葛奴申及招撫使劉天起送款于崔立張俊民李琦奔汴京王

壁還歸德癸巳崔立以梁王從恪荆王守純及諸宗室男女五百餘人至青城皆及於難甲午兩宮北遷甲辰鄧州節度使移刺瑗以其城叛與白華俱亡入宋六月己卯官奴及其黨阿里合白進皆伏誅上御雙門赦忠孝軍以安反側遂決策遷蔡詔蔡息陳頴各以兵來迓中京留守權參政烏林答胡土棄城奔蔡壬午中京破留守兼便宜總帥強伸死之戊子召徐州行省完顏忽斜虎赴行在所以抹撚兀典代行省事郭恩爲總帥兼節度使辛卯上發歸德留元帥王壁守之壬辰次亳州癸巳以亳州節度使王進同知節度使王賓徵民丁運鐵甲糗糧留權參政張天綱董之就遷有功將士臨淄郡王王義深據靈壁望口寨以叛遣近侍直長女奚烈完出將徐宿兵討之義深敗走漣水入宋丙申亳州鎮防軍崔復哥殺守臣王賓等張天綱以便宜授復哥節度使罷運鐵甲糗糧州人乃安己亥上入蔡州詔尙書省爲書召武仙會兵入援徐州行省抹撚兀典赴蔡州起復右丞相致仕賽不代行省事七月癸卯朔曲赦蔡州管內雜犯死罪以下官吏軍民普覃兩官經應辦者更遷一官弛門禁通衆貨蔡人便之乙巳以烏古論鎬爲御史大夫總帥如故張天綱爲御史中丞

仍權參政完顏藥師爲鎮南軍節度使兼蔡州管內觀察使戊申左右司郎中烏古論蒲鮮兼息州刺史權元帥右都監行帥府事征行元帥權總帥婁室簽樞密院事己酉選室女備宮中使令己得數人以右丞忽斜虎諫留識文義者一人餘聽自便乙卯遣魏璠徵武仙兵丁已護衛蒲鮮石魯負祖宗御容至自汴勅有司奉安于乾元寺前御史大夫蒲察世達西面元帥把撒合自汴來歸辛酉武仙刼將士謀取宋金州至浙水衆潰行六部尙書盧之侍郎石玠謀歸蔡州仙追芝不及遂殺玠丁卯定進馬遷賞格又定括馬罪格以簽樞密院事權參政抹撚兀典領其事遣使分詣諸道選兵會于蔡己巳以蒲察世達爲吏部侍郎權行六部尙書八月癸酉朔以秦州元帥粘哥完展權參知政事行省事於陝西諭以蠟書期九月中徵兵與上會于饒豐關欲出宋不意以取興元甲戌大元使王楫諭宋還宋以軍護其行青山招撫盧進得邏吏言以聞上爲之懼丁丑上閱兵于見山亭癸未元帥楚珩復立壽州於蒙城詔遷賞有差州縣官皆眞授乙酉大元召宋兵攻唐州元帥右監軍烏古論黑漢死于戰主帥蒲察某爲部曲兵所食城破宋人求食人者盡戮之餘無所犯宋人

駐兵息州南丙戌詔權參政抹撚兀典簽樞密院事婁室行省院于息州丁亥烏古
論鎬權參知政事兀林答胡土爲殿前都點檢庚寅初設四隅機察官壬辰息州行
省抹撚兀典以兵襲宋人于中渡店斬獲甚衆乙未萬年節州郡以表來賀二十餘
所辛丑設四隅和糴官及惠民司以太醫數人吏直病人官給以藥仍擇年老進士
二人爲醫藥官九月癸卯朔假蔡州都軍致仕內族阿虎帶同僉大陸親府事使宋
借糧入辭上諭之曰宋人負朕深矣朕自卽位以來戒飭邊將無犯南界邊臣有自
請征討者未嘗不切責之向得宋一州隨卽付與近淮陰來歸彼多以金幣爲贖朕
若受財是貨之也付之全城秋毫無犯清口臨陣生獲數千人悉以資糧遣之今乘
我疲敝據我壽州誘我鄧州又攻我唐州彼爲謀亦淺矣大元滅國四十以及西夏
夏亡及於我我亡必及於宋唇亡齒寒自然之理若與我連和所以爲我者亦爲彼
也卿其以此曉之至宋宋不許戊申魯山元帥元志率兵入援賜以大信牌升爲總
帥庚戌以重九拜天于節度使廳羣臣陪從成禮上而諭之曰國家自開創涵養汝
等百有餘年汝等或以先世立功或以勞効起身被堅執銳積有年矣今當厄運與

朕同患可謂忠矣比聞北兵將至正汝等立功報國之秋縱死王事不失爲忠孝之鬼往者汝等立功常慮不爲朝廷所知今日臨敵朕親見之矣汝等勉之因賜卮酒酒未竟邏騎馳奏敵兵數百突至城下將士踴躍咸請一戰上許之是日分軍防守四面及子城以總帥李尤魯婁室守東面內族承麟副之參知政事烏古論鎬守南面總帥元志副之殿前都點檢兀林答胡土守西面忠孝軍元帥蔡八兒副之忠孝軍元帥權殿前右副點檢王山兒守北面元帥紇石烈柏壽副之遙授西安軍節度使兼殿前右衛將軍行元帥府事女奚烈完出守東南元帥左都監夾谷當哥副之殿前右衛將軍權左副都點檢內族斜烈守子城都尉王愛實副之辛亥大元兵築長壘圍蔡城己未括蔡城粟辛酉禁公私釀酒十月戊辰更造天興寶辛巳縱飢民老稚羸疾者出城癸未徐州守臣郭恩殺逐官吏以叛行省賽不死之甲申給飢民船聽採城壕菱芡水草以食戊子徵諸道兵辛卯上閱射于子城中者賞麥有差丙申殿前左副都點檢溫敦昌孫戰歿戊戌賜義軍戰歿被創者麥十一月辛丑朔以右副都點檢阿勒根移失刺爲宣差鎮撫都彈壓別設彈壓四員副之四隅機察亦

隸焉宋遣其將江海孟珙帥兵萬人獻糧三十萬石助大元兵攻蔡十二月甲戌盡籍民丁防守括婦人壯健者假男子衣冠運大石上親出撫軍丁丑大元兵決練江宋兵決柴潭入汝水己卯大元兵破外城宿州副總帥高刺哥戰歿辛巳以總帥字尤魯婁室殿前都點檢兀林答胡土皆權參政都尉完顏承麟爲東面元帥權總帥己丑大元兵墮西城上謂侍臣曰我爲金紫十年太子十年人主十年自知無大過惡死無恨矣所恨者祖宗傳祚百年至我而絕與自古荒淫暴亂之君等爲亡國獨此爲介介爾又曰古無不亡之國亡國之君往往爲人囚繫或爲俘獻或辱於階庭閉之空谷朕必不至於此卿等觀之朕志決矣都尉王愛實戰歿砲軍總帥王銳殺元帥夾谷當哥率三十人降大元庚寅以御用器皿賞戰士甲午上徵服率兵夜出東城謀遁及柵不果戰而還乙未殺尙廐馬五十疋官馬一百五十疋犒將士三年正月壬寅冊柴潭神爲護國靈應王甲辰以近侍分守四城戊申夜上集百官傳位于東面元帥承麟承麟固讓詔曰朕所以付卿者豈得已哉以肌體肥重不便鞍馬馳突卿平日趨捷有將略萬一得免祚脣不絕此朕志也已酉承麟卽皇帝位

百官稱賀禮畢亟出捍敵而南面已立宋幟俄頃四面呼聲震天地南面守者棄門大軍入與城中軍巷戰城中軍不能禦帝自縊于幽蘭軒末帝退保子城聞帝崩率羣臣入哭謚曰哀宗哭奠未畢城潰諸禁近舉火焚之奉御絳山收哀宗骨瘞之汝水上末帝爲亂兵所害金亡

韓魯 金史

韓魯韓國公劾者第二子康宗初蘇濱水含國部韓豁勃堇及韓準職德二部有異志韓帶治之韓賽韓魯爲之佐遂伐韓豁拔其城以歸高麗築九城於曷懶甸韓賽母疾病韓魯代將其兵者數月韓魯亦對築九城與高麗抗出則戰入則守韓賽用之卒城高麗收國二年四月詔韓魯統諸軍與闍母蒲察迪古乃合咸州路都統韓魯古等伐高永昌詔曰永昌誘脅戍卒竊據一方直投其隙而取之爾此非有遠大計其亡可立而待也東京渤海人德我舊矣易爲招懷如其不從卽議進討無事多殺高永昌渤海人在遼爲裨將以兵三千屯東京八甌口永昌見遼政日敗太祖起兵遼人不能支遂覬覦非常是時東京漢人與渤海人有怨而多殺渤海人永昌乃

誘諸渤海并其戍卒入據東京旬月之間遠近響應有兵八千人遂僭稱帝改元隆基遼人討之久不能克永昌使撻不野杓合以幣求救於太祖且曰願併力以取遼太祖使胡沙補往諭之曰同力取遼固可東京近地汝輒據之以僭大號可乎若能歸款當處以王爵仍遣係遼籍女直胡突古來高永昌使撻不野與胡沙補胡突古偕來而永昌表辭不遜且請還所俘渤海人太祖留胡突古不遣遣大藥師奴與撻不野往招諭之斡魯方趨東京遼兵六萬來攻照散城阿徒罕勃堇烏論石準與戰於益褪之地大破之五月斡魯與遼軍遇於瀋州敗之進攻瀋州取之永昌聞取瀋州大懼使家奴鐸刺以金印一銀牌五十來願去名號稱藩斡魯使胡沙補撒八往報之會渤海高禎降言永昌非真降者特以緩師爾斡魯進兵永昌遂殺胡沙補等率衆來拒遇于沃里活水我軍旣濟永昌之軍不戰而却逐北至東京城下明日永昌盡率其衆來戰復大敗之遂以五千騎奔長松島初太祖下寧江州獲東京渤海人皆釋之往往中道亡去諸將請殺之太祖曰旣已克敵下城何爲多殺昔先太師嘗破敵獲百餘人釋之皆亡去旣而往往招其部人來降今此輩亡後日當有効用

者至是東京人恩勝奴仙哥等執永昌妻子以城降卽寧江州所釋東京渤海人也先太師蓋謂世祖云未幾撻不野執永昌及鐸刺以獻皆殺之於是遼之南路係籍女直及東京州縣盡降以幹魯爲南路都統迭勃極烈留烏蠹知東京事詔除遼法省賦稅置猛安謀克一如本朝之制九月幹魯上謁于婆魯買水上慰勞之辛亥幸幹魯第張宴官屬皆預賜賚有差燭偃水部實里古達殺酬幹僕忽得幹魯分胡刺古烏蠹之兵討之酬幹宗室子魁偉善戰年十五隸軍中多見任用以兵五百敗室韋獲其民衆及招降燭偃水部以功爲謀克僕忽得初事撒改從討蕭海里降燭偃水部領行軍千戶從破黃龍府戰達魯古城皆有功其破寧江州渤海乙塞補叛去僕忽得追復之至是與酬幹同被害幹魯至石里罕河實里古達遽去追及于合撻刺山誅其首惡四人撫定餘衆詔曰汝討平叛亂不勞師衆朕甚嘉之酬幹等死於國事聞其尸棄于河俟冰釋必求以葬其民可三百戶爲一謀克以衆所推服者領之仍以其子弟等爲質幹魯乃還天眷中酬幹贈奉國上將軍僕忽得贈昭義大將軍幹魯從都統襲遼主遼主西走西京已降復叛敵據城西浮圖下射攻城者幹魯

與鶻亡魯攻浮圖奪之復以精銳乘浮圖下射城中遂破西京夏國王使李仁輔將兵三萬來救遼次于天德之境婁室與斡魯合軍擊敗之追至野谷殺數千人夏人渡澗水水暴至漂溺者不可勝計遼主在陰山青塚之間斡魯爲西南路都統往襲之使勃刺淑撒曷邁以兵二百襲遼權六院司喝离質於白水濼獲之遼主留輜重於青塚領兵一萬往應州遣照里背答各率兵邀之宗望奄至遼主營盡俘其妻子宗族得其傳國璽斡魯使使奏捷曰賴陛下威靈屢敗敵兵遼主無歸勢必來降已嚴戒鄰境毋納宋人合饋軍糧令銀朮可往代州受之詔徧諭有功將士俟朕至彼當次第推賞遼主戚屬勿去其輿帳善撫存之遼主伶俜去國懷悲負恥恐隕其命孽雖自作而嘗居大位深所不忍如招之肯來以其宗族付之已遣楊璞徵糧於宋銀朮可不須往矣遼趙王習泥烈及諸官吏竝釋其罪且撫慰之太祖還京師宗翰爲西北西南兩路都統斡魯及蒲家奴副之宗翰朝京師詔以夏人言宋侵略新割地以便宜決之斡魯奏曰夏人不盡歸戶口資幣又以宋人侵賜地求援兵宋之邊臣將取所賜夏人疆土蓋有異圖詔曰夏人屢求援兵者或不欲歸我戶口沮吾追

襲遼主事也宋人敢言自取疆土于夏誠有異圖宜謹守備盡索在夏戶口通聞兩國事審處之幹魯復請弗割山西與宋則遼主不能與宋郭藥師交通復詔曰宗翰請毋與宋山西地卿復及此疆場之事當慎毋忽及宗翰等伐宋幹魯行西南西北兩路都統事天會五年薨皇統五年追封鄭國王天德二年配享太祖廟庭子撒八銀青光祿大夫子賽里

宗翰

金史

宗翰本名粘沒喝漢語訛爲粘罕國相撒改之長子也年十七軍中服其勇及議伐遼宗翰與太祖意合太祖敗遼師于境上獲耶律謝十撒改使宗翰及完顏希尹來賀捷卽稱帝爲賀及太宗以下宗室羣臣皆勸進太祖猶謙讓宗翰與阿离合懣蒲家奴等進曰若不以時建號無以繫天下心太祖意乃決遼都統耶律訛里朶以二十餘萬戍邊太祖逆擊之宗翰爲右軍大敗遼人于達魯古城天輔五年四月宗翰奏曰遼主失德中外離心我朝興師大業既定而根本弗除後必爲患今乘其釁可襲取之天時人事不可失也太祖然之卽命諸路戒備軍事五月戊戌射柳宴羣臣

上顧謂宗翰曰今議西征汝前後計議多合朕意宗室中雖有長於汝者若謀元帥無以易汝汝當治兵以俟師期上親酌酒飲之且命之釀解御衣以衣之羣臣言時方暑月乃止無何爲移賚勃極烈副蒲家奴西襲遼帝不果行十一月宗翰復請曰諸軍久駐人思自奮馬亦壯健宜乘此時進取中京羣臣言時方寒太祖不聽竟用宗翰策於是忽魯勃極烈杲都統內外諸軍蒲家奴宗翰魯宗幹宗磐副之宗峻領合札猛安皆受金牌余睹爲鄉導取中京實北京既克中京宗翰率偏師趨北安州與婁室徒單綽里合兵大敗奚王霞末北安遂降宗翰駐軍北安遣希尹經略近地獲遼護衛耶律習泥烈迺知遼主獵于鴛鴦灤殺其子晉王敖魯翰衆益離心西北西南兩路兵馬皆羸弱不可用宗翰使釋盪温都移刺保報都統杲曰遼主窮迫於山西猶事敗獵不恤危亡自殺其子臣民失望攻取之策幸速見諭若有異議此當以偏師討之杲使奔睹與移刺保同來報曰頃奉詔旨不令便趨山西當審詳徐議當時宗翰使人報杲卽整衆俟兵期及奔睹至知杲無意進取宗翰恐待杲約或失機會卽決策進兵使移刺保復往報都統曰初受命雖未令便取山西亦許便宜從

事遼人可取其勢已見一失機會後難圖矣今已進兵當與大軍會于何地幸以見報宗幹勸杲當如宗翰策杲意乃決約以奚王嶺會議宗翰至奚王嶺與都統杲會杲軍出青嶺宗翰軍出瓢嶺期于羊城灤會軍宗翰以精兵六千襲遼主聞遼主自五院司來拒戰宗翰倍道兼行一宿而至遼主遽去乃使希尹等追之西京復叛耿守忠以兵五千來救至城東四十里蒲察烏烈谷蔽先擊之斬首千餘宗翰宗雄宗幹宗峻繼至宗翰率麾下自其中衝擊之使餘兵去馬從旁射之守忠敗走其衆殲焉宗翰弟扎保迪沒于陣天眷中贈扎保迪特進云宗翰已撫定西路州縣部族謁上于行在所遂從上取燕京燕京平賜宗翰希尹撻懶耶律余睹金器有差太祖既以燕京與宋人還軍次鴛鴦灤不豫將歸京師以宗翰爲都統昃勃極烈昱迭勃極烈幹魯副之駐軍雲中太宗卽位詔宗翰曰寄爾以方面當遷官資者以便宜除授因以空名宣頭百道給之宋人來請割諸城宗翰報以武朔二州宗翰請曰宋人不歸我叛亡阻絕燕山往來道路後必敗盟請勿割山西郡縣太宗曰先皇帝嘗許之矣當與之諸將獲耶律馬哥宗翰歸之京師詔以馬七百匹給宗翰軍以田種千石

米七千石賑新附之民詔曰新附之民比及農時度地以居之宗翰請分宗望撻懶石古乃精兵討諸部詔曰宗望軍不可分別以精銳五千給之宗翰朝太祖陵入見上奏曰先皇帝時山西南京諸部漢官軍帥皆得承制除授今南京皆循舊制惟山西優以朝命詔曰一用先皇帝燕京所降詔勅從事卿等度其勤力而遷授之宗翰復奏曰先皇帝征遼之初圖宋協力夾攻故許以燕地宋人既盟之後請加幣以求山西諸鎮先皇帝辭其加幣盟書曰無容匿逋逃誘擾邊民今宋數路招納叛亡厚以恩賞累疏叛人姓名索之童貫嘗期以日月約以誓書一無所致盟未期年今已如此萬世守約其可望乎且西鄙未寧割付山西諸郡則諸軍失屯據之所將有經略或難持久請姑置勿割上悉如所請上以宗翰破遼經略夏國奉表稱藩深嘉其功以馬十匹使宗翰自擇二匹餘賜羣帥及幹魯奏宋不遣歲幣戶口事且將渝盟不可不備太宗命宗翰取諸路戶籍按籍索之而闔母再奏宋敗盟有狀宗翰宗望俱請伐宋於是諳班勃極烈杲領都元帥居京師宗翰爲左副元帥自太原路伐宋宗翰發自河陰遂降朔州克代州圍太原府宋河東陝西軍四萬救太原敗于汾河

之北殺萬餘人宗望自河北趨汴久不聞問遂留銀朮可等圍太原宗翰率師而南降定諸縣及威勝軍下隆德府實潞州軍至澤州宋使至軍中始知割三鎮講和事路允迪以宋割太原詔書來太原人不受詔宗翰取文水及孟縣復留銀朮可圍太原宗翰乃還山西宋少帝誘蕭仲恭貽書余睹以興復遼社稷以動之蕭仲恭獻其書詔復伐宋八月宗翰發自西京九月丙寅宗翰克太原執宋經略使張孝純等鶻沙虎取平遙降靈石介休孝義諸縣十一月甲子宗翰自太原趨汴降威勝軍克隆德府遂取澤州撒刺答等先已破天井關進逼河陽破宋兵萬人降其城宗翰攻懷州克之丁亥渡河閏月宗翰至汴與宗望會兵宋約畫河爲界復請修好不克和丙辰銀朮可等克汴州辛酉宋少帝詣軍前舍青城十二月癸亥少帝奉表降詔元帥府曰將帥士卒立功者第其功之高下遷賞之其殞身行陣沒於王事者厚卹其家賜贈官爵務從優厚使勗就軍中勞賜宗翰宗望使皆執其手以勞之四月以宋二王及其宗族四百七十餘人及珪璋寶印袞冕車輅祭器大樂靈臺圖書與大軍北還七月賜宗翰鐵券除反逆外餘皆不問賜與甚厚宗翰奏河北河東府鎮州縣請

擇前資官良能者任之以安新民上遣耶律暉等從宗翰行詔黃龍府路南路東京路於所部各選如耶律暉者遣之宗翰遂趨洛陽宋董植以兵至鄭州鄭州人復叛宗翰使諸將擊董植軍復取鄭州遂遷洛陽襄陽潁昌汝鄭均房唐鄧陳蔡之民於河北而遣婁室平陝西州郡是時河東寇盜尙多宗翰乃分留將士夾河屯守而還師山西昏德公致書請立趙氏奉職修貢民心必喜萬世利也宗翰受其書而不答康王遣王師正奉表密以書招誘契丹漢人獲其書奏之太宗下詔伐康王河北諸將欲罷陝西兵併力南伐河東諸將不可曰陝西與西夏爲鄰事重體大兵不可罷宗翰曰初與夏約夾攻宋人而夏人弗應而耶律大石在西北交通西夏吾舍陝西而會師河北彼必謂我有急難河北不足虞宜先事陝西略定五路旣弱西夏然後取宋宗翰蓋有意于夏人也議久不決奏請于上上曰康王構當窮其所往而追之俟平宋當立藩輔如張邦昌者陝右之地亦未可置而不取於是婁室蒲察帥師繩果婆盧火監戰平陝西銀朮可守太原耶律余睹留西京宗翰會東軍于黎陽津遂會睿宗于濮進兵至東平宋知府權邦彥棄家宵遯降其城駐軍東平東南五十里

復取徐州先是宋人運江淮金幣皆在徐州官庫盡得之分給諸軍襲慶府來降宋知濟南府劉豫以城降于撻懶乃遣拔离速烏林答泰欲馬五襲康王于揚州未至百五十里馬五以五百騎先馳至揚州城下康王聞兵來已於前一夕渡江矣於是康王以書請存趙氏社稷先是康王嘗致書元帥府稱大宋皇帝構致書大金元帥帳前至是乃貶去大號自稱宋康王趙構謹致書元帥閣下其四月七日兩書皆然元帥府答其書招之使降於是撻懶宗弼拔离速馬五等分道南伐宗弼之軍渡江取建康入于杭州康王入海阿里蒲盧渾等自明州行海三百里追之弗及宗弼乃還其後宗翰欲用徐文策伐江南睿宗宗弼議不合乃止語在劉豫傳歸德叛都統大紘里平之初太宗以斜也爲諳班勃極烈天會八年斜也薨久虛此位而熙宗宗峻子太祖嫡孫宗幹等不以言太宗而太宗亦無立熙宗意宗翰朝京師謂宗幹曰儲嗣虛位頗久合刺先帝嫡孫當立不早定之恐授非其人宗翰日夜未嘗忘此遂與宗幹希尹定議入言於太宗請之再三太宗以宗翰等皆大臣義不可奪乃從之遂立熙宗爲諳班勃極烈於是宗翰爲國論右勃極烈兼都元帥熙宗卽位拜太保

尙書令領三省事封晉國王乞致仕詔不許天會十四年薨年五十八追封周宋國王正隆二年例封金源郡王大定間改贈秦王諡桓忠配享太祖廟廷孫秉德斜哥秉德別有傳

宗弼 金史

宗弼本名斡曷又作兀朮亦作幹出或作晃幹出太祖第四子也希尹獲遼護衛習泥烈問知遼帝獵鴛鴦灤都統杲出青嶺宗望宗弼率百騎與馬和尚逐越盧孛古野里斯等馳擊敗之宗弼矢盡遂奪遼兵士槍獨殺八人生獲五人遂審得遼主在鴛鴦灤斂獵尙未去可襲取者及宗望伐宋宗弼從軍取湯陰縣降其卒三千人至御河宋人已焚橋不得渡合魯索以七十騎涉之殺宋焚橋軍五百人宗望遣吳孝民先入汴諭宋人宗弼以三千騎薄汴城宋上皇出奔選百騎追之弗及獲馬三千而還宗望薨宗輔爲右副元帥狗地淄青宗弼敗宋鄭宗孟數萬衆遂克青州復破賊將趙成于臨朐大破黃瓊軍遂取臨朐宗輔軍還遇敵三萬衆于河上宗弼擊敗之殺萬餘人詔伐宋康王宗輔發河北宗弼攻開德府糧乏轉攻濮州前鋒烏林答

秦欲破王善二十萬衆遂克濮州降旁近五縣攻開德府宗弼以其軍先登奮擊破之攻大名府宗弼軍復先登破其城河北平宋主自揚州奔于江南宗弼等分道伐之進兵歸德城中有自西門北門出者當海復敗之乃絕隍築道列礮隍上將攻之城中人懼遂降先遣阿里蒲盧渾至壽春宗弼軍繼之宋安撫使馬世元率官屬出降進降廬州再降巢縣王善軍當海等破酈瓊萬餘衆于和州遂自和州渡江將至江寧西二十里宋杜充率步騎六萬來拒戰鷓鴣盧補當海迪虎大臭合擊破之宋陳邦光以江寧府降留長安奴幹里也守江寧使阿魯補幹里也別將兵狗地下太平州濠州及句容溧陽等縣沂江而西屢敗張永等兵杜充遂降宗弼自江寧取廣德軍路追襲宋主于越州至湖州取之先使阿里蒲盧渾趨杭州具舟于錢塘江宗弼至杭州官守巨室皆逃去遂攻杭州取之宋主聞杭州不守遂自越奔明州宗弼留杭州使阿里蒲盧渾以精兵四千襲之訛魯補木列速降越州大臭破宋周汪軍阿里蒲魯渾破宋兵三千遂渡曹娥江去明州二十五里大破宋兵追至其城下城中出兵戰失利宋主走入于海宗弼中分麾下兵會攻明州克之阿里蒲盧渾泛海至

昌國縣執宋明州守趙伯諤伯諤言宋主奔温州將自温州趨福州矣遂行海追三百餘里不及阿里蒲盧渾乃還宗弼軍自杭州遂取秀州赤盞暉敗宋軍于平江遂取平江阿里率兵先趨鎮江宋韓世忠以舟師扼江口宗弼舟小契丹漢軍沒者二百餘人遂自鎮江沂流西上世忠襲之奪世忠大舟十艘於是宗弼循南岸世忠循北岸且戰且行世忠艤幢大艦數倍宗弼軍出宗弼軍前後數里擊柝之聲自夜達旦世忠以輕舟來挑戰一日數接將至黃天蕩宗弼乃因老鶴河故道開三十里通秦淮一日一夜而成宗弼乃復至江寧撻懶使移刺古自天長趨江寧援宗弼烏林答泰欲亦以兵來會連敗宋兵宗弼發江寧將渡江而北宗弼軍渡自東移刺古渡自西與世忠戰于江渡世忠分舟師絕江流上下將左右掩擊之世忠舟皆張五繡宗弼選善射者乘輕舟以火箭射世忠舟上五繡五繡著火箭皆自焚煙焰滿江世忠不能軍追北七十里舟軍殲焉世忠僅能自免宗弼渡江北還遂從宗輔定陝西與張浚戰于富平宗弼陷重圍中韓常流矢中目怒拔去其矢血淋漓以土塞創躍馬奮呼搏戰遂解圍與宗弼俱出既敗張浚軍于富平遂與阿盧補招降熙河涇原

兩路及攻吳玠于和尚原抵險不可進乃退軍伏兵起且戰且走行三十里將至平地宋軍陣于山口宗弼大敗將士多戰沒明年復攻和尚原克之天會十五年爲右副元帥封藩王天眷元年撻懶宗磐執議以河南之地割賜宋詔遣張通古等奉使江南明年宋主遣端明殿學士韓肖胄奉表謝遣王倫等乞歸父喪及母韋氏兄弟宗弼自軍中入朝進拜都元帥宗弼察撻懶與宋人交通賂遺遂以河南陝西與宋奏請誅撻懶復舊疆是時宗磐已誅撻懶在行臺復與鶻懶謀反會置行臺於燕京詔宗弼爲太子領行臺尙書省都元帥如故往燕京誅撻懶撻懶自燕京南走將亡入于宋追至祁州殺之詔諸州郡軍旅之事決于帥府民訟錢穀行臺尙書省治之宗弼兼總其事遂議南伐太師宗幹以下皆曰構蒙再造之恩不思報德妄自鷓張祈求無厭今若不取後恐難圖上曰彼將謂我不能奄有河南之地且都元帥久在方面深究利害宜卽舉兵誅之遂命元帥府復河南疆土詔中外宗弼由黎陽趨汴右監軍撒離喝出河中趨陝西宋岳飛韓世忠分據河南州郡要害復出兵涉河東駐嵐石保德之境以相牽制宗弼遣孔彥舟下汴鄭兩州王伯龍取陳州李成取洛

陽自率衆取亳州及順昌府嵩汝等州相次皆下時暑宗弼還軍于汴岳飛等軍皆
退去河南平時天眷三年也上使使勞問宗弼以下將士凡有功軍士三千竝加忠
承校尉攻嵐石保德皆克之宗弼入朝是時上幸燕京宗弼見於行在所居再旬宗
弼還軍上起立酌酒飲之賜以甲冑弓矢及馬二匹宗弼已啟行四日召還至日希
尹誅越五日宗弼還軍進伐淮南克廬州上幸燕京宗弼朝燕京乞取江南上從之
制詔都元帥宗弼北還軍與宰相同入奏事俄爲尙書左丞相兼侍中太保都元帥
領行臺如故詔以燕京路隸尙書省西京及山後諸部族隸元帥府乃還軍遂伐江
南旣渡淮以書責讓宋人宋人答書乞加寬宥宗弼令宋主遣信臣來稟議宋主乞
先歛兵許敵邑拜表闕下宗弼以便宜約以畫淮水爲界上遣護衛將軍撒改往軍
下勞之二年二月宗弼朝京師兼監修國史宋主遣端明殿學士何鑄等進誓表其
表曰臣構言今來畫疆合以淮水中流爲界西有唐鄧州割屬上國自鄧州西四十
里并南四十里爲界屬鄧州其四十里外並西南盡屬光化軍爲敵邑沿邊州城旣
蒙恩造許備藩方世世子孫謹守臣節每年皇帝生辰并正旦遣使稱賀不絕歲貢

銀絹二十五萬兩匹自壬戌年爲首每春季差人般送至泗州交納有渝此盟明神是殛墜命亡氏蹈其國家臣今旣進誓表伏望上國蚤降誓詔庶使敵邑永有憑焉宗弼進拜太傅迺遣左宣徽使劉筈使宋以袞冕圭寶珮璫玉册册康王爲宋帝其册文曰皇帝若曰咨爾宋康王趙構不弔天降喪于爾邦亟瀆齊盟自貽顛覆俾爾越在江表用勤我師旅蓋十有八年于茲朕用震悼斯民其何罪今天其悔過誕誘爾衷封奏狎至願身列于藩輔今遣光祿大夫左宣徽使劉筈等持節册命爾爲帝國號宋世服臣職永爲屏翰嗚呼欽哉其恭聽朕命仍詔天下賜宗弼人口牛馬各千駝百羊萬仍每歲宋國進貢內給銀絹二千兩匹宗弼表乞致仕不許優詔答之賜以金券皇統三年爲太師領三省事都元帥領行臺尙書省事如故皇統八年薨大定十五年諡忠烈十八年配享太宗廟庭子孛迭